

弘

簡

錄

弘簡錄卷二百十七

明刑部員外郎仁和弘齋邵經邦學

皇清翰林院侍講學士四世孫遠平校閱

載記 金主之六

章宗皇帝父皇太子允恭母徒單氏大定八年世宗幸金蓮川七月丙戌次冰井而生翼日幸東宮宴飲歡甚語太子曰祖宗積慶以有今日皆社稷之福也又語司徒李石樞密紇石烈志寧等曰朕子雖多皇后止有太子一人幸見嫡孫朕愛麻達葛山地衍而氣清適皇孫生卽小字麻達葛羣臣皆稱萬歲年十一封金源郡王令習本朝語言文字及漢字經書以進士完顏匡司經徐孝美等侍讀二十四年太子令奉表詣上京問安仍請車駕還都世宗嘉其意賜勅書答諭明年萬春節復奉表朝

賀太子薨上遣滕王府長史再與御院通進阿里剌來護視十月  
二月進封原王判大興府事入以國語謝世宗喜令宰臣諭旨  
朕嘗命諸王學本朝語惟汝甚習朕因其年幼且服制中未可  
付以職務亦須令學政事京輦之任欲令親見朝廷議論習知  
政事之體故也問其行事咸言見事甚明予奪皆不失當曹叅  
二王俱弗能及又聞有女直人訴事以女直語問之漢人訴事  
以漢語問之不忘本者聖人之道也以西夏小邦崇尚舊俗猶  
能保國數百年故凡事莫如一任其真也明年四月賜名璟五  
月拜右丞相方四日世宗問京尹與省事同乎對曰不同上笑  
曰京尹浩穰尚書省總大體所以不同自後屢試以事甚有可  
學之資諭令觀宮中輿地圖可以具知天下遠近阨塞十一月  
詔立高麗王王謝於慶和殿復面諭爾年尚幼因父早亡朕

從古禮嫡長孫爲後建立在朕保守在汝宜行正養德勿近邪  
佞事朕必盡忠孝無失衆望則惟汝嘉次年三月辛亥上御大  
安殿授冊赦中外丁巳謁謝太廟及山陵始受百官牋賀詔選  
秉性純謹正直者以爲官屬勿用有權術之人上嘗語以爾續  
先朝實錄太祖征麻產至泥淖馬不能進捨而步戰創業之艱  
如此可不思乎世宗不豫詔於慶和殿東廡攝政聽受五品以  
下官丁亥受攝政之寶崩日卽位柩前丙申大赦賜內外官單  
恩兩重三品以上一重免今歲租稅并自來懸欠係官等錢錄  
寡孤獨人絹一匹米兩石甲辰以大理卿王允德等報哀于宋  
并二國二月癸亥始聽政追尊皇考爲皇帝母爲皇太后更所  
居宮曰隆慶甲子命學士院進呈漢唐便民事及當今急務成  
辰詔宮籍監戶舊係睿宗及大行皇帝皇考之奴婢者悉放爲

良已已敕御史臺目今監察令本臺辟舉任內不稱職亦從奏  
罷丁丑增定百官俸乙酉詔有司稽考典故許引用宋事是月  
宋主內禪立光宗三月壬辰朝于隆慶宮己酉立生辰爲天壽  
節五月丙午耐廟禮成大赦丁未地生白毛庚戌詔罷送宣錢  
今後諸護衛考滿賜官錢二千貫壬子收收錄功臣子孫量材  
於局分承應戊午河溢曹州閏月丙寅觀稼於近郊壬申封乳  
母孫氏蕭國夫人姚氏莘國夫人癸未詔學士院自今誥詞並  
用四六乙酉詔諸有司身承應人係將來受親民之職可命所  
屬諭使爲學其護衛符寶奉御奉職侍直近密當選有德行學  
問之人爲之教授六月己丑朔從有司言律科舉人止知讀律  
不知教化之原必使通治論語孟子涵養器度遇府會試委經  
義試官出題別試與本科通定去留庚寅詔有司請親王到任

各給錢二十萬辛卯上納修起居注完顏烏者知登聞院孫譯  
言罷園獵拾遺馬升上儉德箴乙未詔曰朕初卽位憂勞萬民  
每念刑獄未平農桑未勉吏或不循法度以隳吾治朝廷遣使  
廉問事難周悉惟提刑勸農采訪之官自古有之今分九路專  
設是職並兼勸農采訪事屯田鎮防諸軍皆屬焉丁酉幸慶壽  
寺作盧溝石橋七月辛酉減民地稅十之一河東南北路十之  
二下田十之三辛巳初設經童科詔京府節鎮防禦州設學養  
士其長貳幕職內各以進士官提控其事仍具入銜八月戊子  
朔奉皇太后幸壽安宮壬辰初定品官子孫試補令史格及提  
刑司所掌三十二條設女直契丹漢兒知法各一人左司諫執  
安民上疏勸上崇節儉去嗜欲廣學問凡三事丁酉如大房山  
戊戌謁真諸陵己亥還都九月庚申詔增守山陵爲二十丁給

地十頃丙子獵于近郊張汝霖諫詔答曰卿能每事如此朕復何憂然時異事殊如能斟酌得中斯爲當矣十月辛卯上以翰林關人從汝霖薦以鳳翔治中郝俱爲之丙申冬獵己亥次羅山庚子次玉田辛丑沁與丹州進嘉禾丁亥次寶坻癸丑還宮十一月戊辰諭尚書省每歲令內外官各舉所知限以所舉之數違者悉坐蔽賢之罪仍依唐制凡五品以上官到任卽舉自代並從提刑司採訪之己巳初制轉遞文字法辛巳詔有司今後諸處或有饑饉令總管節度使或提刑司先行賑貸或賑濟然後言上十二月丙戌朔詔罷鑄錢丁亥密州進白雉戊戌復置北京遼東運鹽使司罷巡鹽使己亥賑寧化保德嵐州饑其流移復業給復一年乙巳祭奠興陵壬子諭臺臣提刑司所舉劾多小過行則失大禮不行恐有所沮其以此意諭之冬無雪

是歲遣使弔祭并賀卽位生辰正旦遼宋及二國並如故事

明昌元年正月丙辰朔改元以居喪不受朝賀甲子如大房山  
乙丑奠謁興裕二陵丙寅還都戊辰勅外路求世宗御書辛未  
如近畿春水二月甲辰還都三月乙巳擊毬於西苑百寮會觀  
乙亥初設應制及宏詞科壬午如壽安宮五月不雨乙卯祈于  
北郊及太廟戊午拜天于西苑射柳擊毬縱百姓觀壬戌祈雨  
于社稷甲子制省元及四舉終塲人許該恩己巳祈雨于太廟  
庚午置知登聞鼓院事官一員勅設此院所以通達冤枉舊嘗  
鎖戶其令開之丙子雨未降望祭嶽鎮海濱于北郊以祈六月  
甲辰勅僧道三年一試七月丁丑詔罷西北路蝦蟆山市場八  
月乙酉詔設常平倉壬辰幸玉泉山卽日還宮癸巳罷諸府鎮  
流泉務選才幹之官爲諸州刺史皆名見諭戒之戊戌集百官



議何以使民棄末務本以廣儲蓄戶部尚書鄧儼右丞移刺履  
叅政守貞徒單諡曰凡人之情見美則願若不節以制度將見  
奢侈無極費用過多民之貧乏殆由此致方今承平之際正宜  
講究此事爲經久法上是其言以諭宰相丁未獵于近郊九月  
壬子朔天壽節以喪不受朝丙辰以廉能進擢北海縣令張翱  
等十八人官壬戌如秋山十月丁亥還宮丁未獵于近郊十一  
月乙卯詔以惑衆亂民禁罷全真及五行毘盧丙子冬獵己卯  
次雄州判真定府事吳王永成判定武軍節度隋王永升來朝  
十二月壬午免獵地今年稅丁亥次饒陽丁酉還都二年正  
月庚戌朔喪未除不受朝甲寅始許宮中稱聖主乙卯皇太后  
不豫日往侍疾丙夜乃還辛酉崩丙寅以左副都點檢面等報  
哀于宋高麗夏各遣使來弔祭甲戌百官表請聽政不許戊寅

詔賜陔括里部羊三萬以重幣五百端絹二千匹以振其乏二月壬辰上始視朝勅以科目近多得人因尚書省奏增取進士今後有司會試程文但合格者取之母限人數丙午初設王傅府尉官三月癸亥敕有司但州府名犯前代國號者不得以封臣下詔改遼爲恒州宋爲汴州秦爲鎬州晉爲并州漢爲益州梁爲邵州齊爲彭州殷爲譙州唐爲絳州吳爲鄂州蜀爲夔州陳爲宛州隋爲涇州虞爲澤州四月乙酉祔葬裕陵戊子制諸部內災傷主司應言而不言及妄言者罪戾實禁民庶不得服純黃銀褐色婦人勿禁辛卯幸壽安宮諫官張緯等疏止其行不允癸巳諭有司自今女直字直譯爲漢字罷國史院專寫契丹字者戊戌增太學博士助教員己亥學士院新進唐杜甫韓愈劉禹錫杜牧賈島王建宋王禹偁歐陽修王安石蘇軾張耒

秦觀等集二十六部庚子改壽安宮名萬寧壬寅車駕臨幸五月庚戌敕自今四日一奏事仍免朝戊辰詔以終場舉人克御史臺令史六月癸巳禁稱本朝人及本朝言語爲蕃違者杖之七月巳未觀稼于近郊八月巳亥勅山東河北闕食等處許納粟補官九月甲寅如大房山乙卯謁莫裕陵丙辰還都庚申如秋山十月巳丑還都壬寅河北山東旱減死罪一等徒以下釋之十一月戊午夏人殺邊將阿魯帶三年正月乙巳朔皇太后喪不受朝丙辰小祥從尚書省議依元年世宗忌辰例諸王陪位服慄素去金玉之飾百官不視事仍禁音樂屠宰壬戌如春水二月壬辰還京辛丑詔追復田穀等官爵三月辛巳初設左右衛副將軍癸未盧溝石橋成幸熙春園丁亥如萬寧宮上嘗問忻州陳毅上書其一極論守令之弊上謂方今正欲知之

命宰臣面問所以救之道如穀所言隨處有司不能奉行條制爲人傭僱尚須出力况食國家之祿而乃如是得無虧臣子之行乎其令檢會前後所降條理舉行之丁酉命有司祈雨望祀嶽鎮海濱于北郊四月甲辰旱災祈雨于社稷丙辰下詔賫躬丁卯上親望祭如前儀戊辰遣中丞吳鼎樞等會決中都冤獄外路委提刑司處決左丞守貞等上表乞解職不允叅政衛萬公入謝上令速行前詔能不急之役省無名之費議冗官決滯獄四事五月甲戌雨戊寅出宮女百八十三人尚書省奏山東河北饑已委宣差所至安撫賑濟復遣右三部司正范文淵往視之戊子雨足百官入賀己丑禱謝諸神六月癸卯定諸路提刑司條制宰臣請罷之上曰若論官止三十餘員猶患不得其人州郡三百餘處其能盡得人乎弗許甲寅久雨復命有司

祈晴辛酉詔定內外所司公事故作疑申呈罪罰格乙丑有司  
言河州災傷民乏食詔免租稅諭戶部預給百官冬季俸令就  
倉以時直糴與貧民秋成各以其貲糴之以便上下其承應人  
不願者聽七月戊寅敕尚書省饑民如至遠東恐遠難得食必  
有餓死者其令散樵官計口分散仍隨所欲居止給以文書命  
富者出粟限以兩月其粟充秋稅之數已卯邢州刺史頓長壽  
安武軍節度副使胡刺坐賑濟不及四縣各杖五十癸未詔增  
北邊軍千二百人分置諸堡八月癸卯上以軍民不和吏員姦  
幣詔四品以下六品以上咸集尚書省問以朝政得失及民間  
利害各述所見以聞辛酉獵于近郊乙丑上語宰臣朕欲任官  
令久于其事使中材之人久于其職事既熟終亦得力若今日  
作禮官明日司錢穀雖間有異材事亦難辨爾等當悉朕意又

問太常卿張曄古有三恪今何無之令具典故以聞九月庚午  
朔諭尚書省去歲被災傷處所闕租稅及借貸錢粟若便徵之  
恐貧民未蘇俟豐收日以分數察徵可也又言隨路提刑司舊  
止察老病不任職及不堪親民者改除他路若他路提刑覆察  
得實勿復注親民之職卿等共議行之已卯如秋山免圍場經  
過人戶今歲夏秋租稅之半曾當差役者復一年十月壬寅還  
京丙午敕御史臺提刑司自今保申廉能官勿復有乞升品語  
應保舉官及試中書判者委官覆察言行相副量與陞除隨朝  
及六品以上各隨所長用之甲寅敕置常平倉處並令州府提  
刑縣官兼管勾其事以所糴多寡約量陞降定爲永制戊午諭  
尚書省訪求博物多知之士已巳獵于近郊十一月丙子詔臣  
庶名犯古帝王而姓復同者禁之周公孔子之名亦令回避戊

寅升和州爲彰德府十二月辛亥諭有司祈雪癸亥獵于近郊  
丙辰有赤氣見于北方丁巳敕華州下邽縣置武定鎮倉京兆  
櫟陽縣置栗邑鎮倉許州舞陽縣置北舞渡倉各設倉草都監  
一人縣官兼領之 四年正月己巳朔不受朝賀癸未上責宰  
臣朕旣嘗語卿百官當使久於其職如蘇德秀方任太興府推  
官復改戶曹今又除禮部主事人才豈能兼之以後不可輕易  
又言凡稱政有異迹者謂其斷事有軼才也若止清廉此乃本  
分以貪汙者多故顯其異耳宰臣對曰今所察舉皆先才後德  
巧猾之徒雖有臧污未見汰去猶爲能吏此廉恥所以喪也若  
諭所司察舉官吏必審真僞使有才無行者不能覲覲非道求  
進者加之糾劾則奔競之俗息而廉恥可興矣上嘉納之癸巳  
諭點檢司行宮外地及圍獵之處悉與民耕雖禁地聽民持農

器出入丙申東京路副使王勝進薦遣諭之曰汝職非輕民間利害官吏邪正畧不具聞而乃以薦進此豈汝所職耶後毋復爾二月戊戌朔如春水始以春秋二仲月上戊日祭社稷及日月風雨雷師常祀癸丑獵于姚村浹癸亥還京三月戊辰朔諭諸路提刑司朕特設此官本欲安民于合五年効猶未著多由不識本體職事徒事細碎以致州縣側皆畏縮不敢行事邇者山東民饑朕使賑濟此卿等不職故至於此既往之失其思悛改甲戌定民習角紙槍棒罪甲申幸香山永安寺及玉泉山甲午敕自今御史臺奏事並令修注回避四月丁酉朔幸興陵崇妃第始命舉樂自己亥至癸卯丞相清臣率百官及耆艾學官劉璣亦率大學諸生趙楷等詣紫宸門三表請上尊號上以比年五穀不登百姓流離正當戒懼修身之日豈得虛受榮名



不許戊申禘于太廟庚戌如萬寧宮丁巳敕女直進士及第後  
仍試以騎射中選者升擢之乙丑減尚廩食穀馬五月丙寅朔  
曹王永升率諸王請上尊號亦不許甲戌久雨觀稼于近郊辛  
巳徧諭諸路月具雨澤田禾分數以聞癸未禁命賑河北諸路  
及河州被水饑民六月丙辰以晴致祭嶽鎮海濱八月己亥歲  
星太白晝見庚子大赦甲辰還京辛亥國史院進世宗實錄上  
服袍帶御仁政殿降座立受之九月甲子朔天壽節始御大安  
殿受親王百官及朱高麗夏使朝賀戊辰敕尚書省卽位以後  
士庶言事關係國家邊防大利害已嘗施行者可特補一官有  
益於官民量給以賞庚午如山陵次奉先縣辛未拜天于縣西  
壬申致奠諸陵癸酉如秋山十一月壬午雨木冰丙戌詔諸職  
官以賊污不職被罪以廉能獲升者隨路京府州縣列其姓名

揭之公署以示勸懲十二月甲午朔夏國嗣子李純佑遣使奉  
故王仁孝遺表以進仍來訃告以西上閣門使大畧等爲敕祭  
慰問使甲寅冊長白山神爲開天弘聖帝丙辰獵于近郊是歲  
大有年邢洺深冀及河北十六謀克之地野蠶成繭五年正  
月乙丑昭容李氏進位淑妃己巳初用唐宋典禮皇后忌辰皆  
廢務尚書省進區田法詔相地宜務從民便乙亥詔封始製女  
直字葉魯各神立廟上京納里渾莊歲時致祭官其子孫以主  
奠獻辛巳遣國子祭酒劉璣冊李純佑爲夏國王丁亥幸城南  
別宮丁酉初定長吏勸課能否賞罰格從尚書省奏皇太后祥  
除已久易所居隆慶宮爲東宮慈訓殿爲承華殿戊戌詔購求  
崇文總目內所闕書籍癸丑命宣徽使移剌敏戶部主事赤蓋  
質理哥相視北邊營屯經畫長久之計三月壬申初定限錢禁

戊子置弘文院譯寫經書四月壬辰朔幸北苑壬子特賜翰林待制溫迪罕迪翰林學士承旨中奉大夫乙卯幸景明宮五月庚午次烏十撒入戊子桓撫二州旱遣使禱于縉山六月壬辰如冰井己亥出獵登胡土白山酌酒再拜曹王永升以下進酒丙午拜天曲赦西北路己未如杳沙秋山七月戊辰獵于豁赤火一發貫雙鹿賜恩從官有差辛巳次魯溫合失不乙酉次冰井丙戌天壽節宴樞光殿凡從官及承當人遇覃恩遷秩者並受宣敕於殿前時久雨初霽有龍曳尾于雲間上舉御羹中有髮戒左右毋言八月辛亥還京壬子河決陽武故隄灌封丘而東丁巳賜從幸山後親軍銀絹各有差九月壬申宋遣使來告孝宗之喪戊寅遣尼龐古鑑等爲弔祭使敕尚書省集百官議備邊事壬午特推恩東宮舊人司經王伯溫等八人官有差甲

申命上京等九路并諸抹及乂等處選軍三萬俟來春調發仍  
命諸路并北阻黷以六年夏會兵臨潢十月庚寅宋遣使獻遺  
留物壬寅戶部員外郎何格賑河決被災人戶壬子尚書省奏  
升提刑司所察廉官南皮縣令史肅以下十有二人上知其中  
大典主簿蒙括蠻都其人澆浮常才命再察之閏月戊午朔宋  
遣使來報卽位甲戌以河南北提刑使王啓等爲賀宋主卽位  
使乙亥獵于近郊丙戌以翰林待制與屯忠孝權戶部侍郎太  
府少監溫昉權工部侍郎行戶工部事修治河防免被災民戶  
今年秋稅十二月癸未敕尚書省自今獻蠻芝嘉禾者賞之  
六年正月辛卯詔給天大郡公家屬田宅壬辰如春水庚戌罷  
陝西括地辛酉諭胥持國河上役夫聚居恐生疾疫可舉醫護  
視之乙卯次御林二月丁巳朔敕有司行宮側及獵所有農者

勿禁已未始祭高禩庚午還宮丁丑京師地震大雨雹晝晦震  
應天門右鵠尾癸未宋遣使來報謝三月甲午以翰林直學士  
李木魯子元兼右司諫監察御史田仲禮爲左拾遺翰林修撰  
僕散訛可兼右拾遺諭之曰國家設置諫官非取虛名蓋責實  
效庶幾有所裨益卿等皆朝廷選擢置之諫職如國家利害官  
吏邪正極言無隱近路鐸左遷本以他罪卿等勿以被責遂畏  
縮不言其悉心戮力毋得緘默丙申如萬寧宮戊戌括羣牧所  
三招討司猛安謀克隨孔及迭刺唐古部諸抹西京太原官民  
馳五千克北邊糧運惟民以馳載爲業者勿括又以銀五十萬  
兩錢二十三萬貫以備支給銀五萬兩金盃二千八百兩金牌  
百兩銀盃八千兩絹五萬匹雜綵千端衣四百四十六襲以備  
賞勞庚子郡舉才行之士翟介然以下三人賜進士及第李貞

固以下十五人同進士出身四月丙子幸玉泉山戊寅修河工  
畢進胥持國官二階與屯忠孝以下三十六人各一階獲嘉令  
王維翰以下五十六人各賜銀幣有差五月丙戌命減萬寧宮  
陳設九十四所辛卯以出師遣禮部尚書張臯告于廟社乙未  
竊王永中以罪賜死罪諫官買守謙僕散訛可奏對不實罷之  
田仲禮并中丞孫卽康右補闕蒙括胡刺各罰金二十斤乙巳  
詔諸路猛安謀克農隙講武本路提刑司察其惰者罰之六月  
丙寅以久雨祭七月丙申幸曹王永升第甲辰始定文武官六  
貫石以上承應人并及廢者若在籍儒生章服制八月己巳以  
溫敦伯英言命禮部令學官講經乙亥敕宮中承應人出職後  
三年內犯賊罪者元舉官連坐不在去官之限著爲令辛巳木  
波進馬九月甲申冊靜寧山神爲鎮安公忽土白山神爲瑞聖

公辛卯如秋山十月丙辰還京十一月壬寅初定猛安謀克鎮邊後放免者授官格禁射糧軍應役但成隊伍不得持兵器乙巳以唐括貢移刺仲方張曄等二十三人克計議官凡軍事得預議所進奏帖可直言利害無用浮詞戊申初定縣官增水田陞除制十二月右丞相襄率駙馬都尉僕散揆等進軍大盪濬分兵攻取諸營乙卯詔招撫北邊軍民乙亥加五鎮四瀆王爵庚辰幸後園閱軍器

承安元年正月甲申大盪濬羣牧使移刺覲等爲廣吉刺部兵所敗死之丁亥國學齋長張守愚上平邊議三篇特授本學敎授仍以其議付史館二月初造虎符發兵甲子命有司祀高禩如新儀丁卯右相襄左丞衡至自軍前巳巳復命還軍辛未幸都南行宮春水甲戌還宮三月丁酉如萬寧宮不雨遣官望祭

獄鎮海濱于北郊癸卯救人命至重不可不慎自今刑獄雖已  
奏行其間恐有疑枉其再議以聞甲辰遣參政尼龐古鑑祈雨  
于社稷丁未復遣使就祈于東獄四月辛亥命右丞胥持國再  
禱于太廟壬子遣使審決冤獄京城禁轍扇戊午初行區種法  
民十五以上六十以下有土田者丁種一畝時久不雨命大臣  
仍分禱社稷太廟北獄北郊甲戌宰相奏趙承元請追上孝懿  
皇太后冊寶然後行諡冊禮禮官執奏已詔示中外無追冊禮  
罷之五月庚辰朔親稼于近郊因闕區田乙酉以久旱徙市庚  
寅詔復市如常庚子雨足六月甲寅百姓艱食詔出倉粟十萬  
石減價以糴之乙丑平晉縣民利通家蠶自成綿段長七尺一  
寸五分濶四尺九寸詔賜絹十匹庚午幸環秀亭觀稼七月庚  
辰御紫宸殿受諸王宰執百官賀各賜以酒仍以酒萬尊置通



循賜民縱飲乙酉敕今後高麗夏使入見敷奏令新設各國通  
事具公服與閣門使上殿監聽戊子命有司收瘞西北路陣亡  
骸骨八月癸丑幸玉泉山甲子以郊祀日期詔中外戊辰還京  
九月丁丑朔天節幸天長觀祈禱壬午熙左丞相襄酒百尊  
癸未都人進酒詔以三千一百瓶賜北邊軍吏丙辰祫享于太  
廟十一月庚寅特滿郡牧契丹陲鎖德壽反秦州軍擊敗之丁  
酉朝享于太廟戊戌南郊大赦改元己亥曹王永升率親王百  
官賀癸卯命有司祈雪仍遣官祈于東嶽十二月己酉遣提點  
太醫近侍局使李仁惠勞賜北邊將士授官者萬一千人授賞  
者幾二萬人凡川銀二十萬兩絹五萬匹錢三十二萬貫 二  
年春正月丁亥如安州春水丁酉還京辛丑宋主遣使告其母  
后喪三月壬午命戶部侍郎溫昉佩金符行六部尚書於撫州

庚寅幸西園閱軍器丁酉參知政事裔代左丞相襲行省于北  
京四月甲寅如萬寧宮丙辰命有司祈雨望祭嶽鎮海瀆于北  
郊甲子祈雨于社稷從尚書省奏比歲北邊調度頗多請降僧  
道空名度牒紫褐師德號以助軍儲癸酉親王宣敕始用女直  
字五月甲戌朔諭宰臣比以軍須隨路賦調司縣不度緩急促  
期徵歛使民費及數倍胥克又乘之以侵暴其令提刑司究察  
之丙子再諭官吏今綱紀不立官吏施慢遷延苟簡習以成弊  
職官多以吉善求名計得自安國家何賴焉至於徇情賣法省  
部令史尤甚尚書省其戒諭之庚辰升撫州爲鎮寧軍辛巳雨  
足報祭諸神己丑皇子生封爲壽王未踰年薨六月丙午雨雹  
庚戌詔罷瑤光殿工作甲寅置全州盤安軍節度使置安豐縣  
閏月甲午出西橫門觀稼七月壬寅朔幸天長觀建普天大醮

七日禁屠宰無奏刑百司權停決罰已未命西上閤門使劉頗  
賜參知政事奇宴于行省戊辰天壽節御紫宸殿受朝八月辛  
巳以邊事未寧詔集六品以上官於尚書省問攻守之計議者  
八十四人言攻者五守者四十六且攻且守者三十三名對睿  
思殿論難久之癸未還京九月壬寅遣官分詣上東西北四京  
咸平臨潢等路招募漢軍不足則簽補之乙巳夏使賀天壽節  
朝辭詔答許復保安蘭州權場乙丑始置軍器監掌治戎器班  
少府監下設甲坊利器二署隸焉十月庚午朔初設講議所官  
十員共議錢穀以中都路轉運使孫鐸戶部侍郎高汝礪等爲  
之壬午尚書省行下諸路推排人戶物力甲午大雪賜普濟院  
米千石爲粥以食貧民十一月甲辰冬至有事于南郊乙巳以  
薪貴敕園場地內無禁樵採壬子諭尚書省猛安謀克旣不隸

提刑司宜令監察御史察其臧否甲子諭宰臣朕居九重民間  
難以徧知令採利害以聞十二月己巳朔敕御史臺糾察諸佞  
趨走有實跡者已卯始鑄永安寶貨癸未遣戶部侍郎上官瞻  
體究西京逃亡勸率沿邊軍民耕種戶部郎中李敬義規措臨  
潢等路農務乙酉諭宰臣今後水潦旱蝗盜賊竊發命提刑司  
預爲規畫戊子諭西南路將士三年正月癸卯諭有司凡接  
伴宋夏使者毋以語言相勝務存大體奉使者亦必得人乃可  
乙卯罷講議所丙辰如城南春水改鄉南行宮爲建春丁巳併  
上京東京兩路提刑使副爲一俱兼安撫使副專掌教習武事  
毋令改其本俗甲子還宮乙丑宋遣使告祖母喪以武衛軍都  
指揮使烏林答天益等爲弔祭使二月己巳朔幸建春宮辛巳  
諭宰臣自今內外官闕有才能可任者雖資歷未及亦俱以聞

雖親故毋有所避甲申還京丙戌斜出內附三月壬寅始權醋  
甲寅如萬寧宮丙寅高麗國王皓老疾令母弟暉權國事遣使  
奉表來告遣侍御史孫俱往宣問四月丙申諭御史臺曰隨朝  
大小官雖有才能率多苟簡朕甚惡之其察舉以聞提刑司所  
察廉能汙濫官皆當殿奏餘事可轉以聞五月壬寅射柳擊毬  
縱百姓觀七月丙午幸香山巳酉如萬寧宮甲寅還宮八月辛  
未獵于近郊癸酉獵于香山庚辰以護衛石和尚爲押軍萬戶  
率親軍八百人武衛軍千六百人戌西北路癸未宋遣使來報  
謝九月乙巳獵于近郊戊午木波進馬十月癸未行樞密院言  
斜出等請開推場於轄里梟從之丁亥定官民存留見錢之數  
設回易務更立行用鈔法十一月辛亥以邊事定詔減中外死  
罪徒以下釋之甲寅冬獵十二月甲子朔大風罷獵凍死者五

百餘人已已還都丙戌高麗權國事王暉遣使奉表來告 四  
年二月乙丑如建春宮春水已已還宮庚午御宣華門觀迎佛  
會壬申諭有司自三月一日爲始每旬三品至五品官各一人  
轉對六品亦以次對臺諫勿與有應奏事與轉對官相見無而  
對者聽其上章庚辰上諭點檢司自蒲河至長河及細河以東  
朕常所經行官爲和買其地令百姓耕之仍免其租稅三月已  
亥遣使冊王暉爲高麗國王辛丑戶部尚書孫鐸郎中李仲畧  
國子祭酒趙忱始轉對香閣乙卯從宰臣議罷諸路提點刑獄  
改爲按察使司戊午雨雹四月戊辰如萬寧宮五月壬辰朔早  
下詔責躬求直言避殿減膳審理冤獄戊戌命有司望祭獄瀆  
禱雨已亥應奉翰林文字陳載上言四事一邊民苦于寇掠二  
農民困于軍須三審決冤滯一切從寬苟縱有罪四行省官員

例徒厚賞而沿邊司縣曾不霑及此干和氣致旱災之所由也  
上是之戊申京畿雨上諭宰臣諸路旱或因闕政今惟大興宛  
平兩縣不雨得非守令之過司空璣等上表待罪上以罪已答  
之令各還職庚戌尚書省奏上更定給發虎符制著于令壬子  
祈雨于太廟乙卯更定軍功賞格六月丁卯雨復御殿加膳甲  
戌雨足命有司報謝丁丑從右補闕楊廷秀言自轉對官外復  
令隨朝八品以上外路五品以上及出使外路有時政得失民  
間利病可言者並許移檢院以聞癸未奉職醜和尚進浮漏水  
稱影儀簡儀圖命有司依式造之丁亥定宮中親戚非公事傳  
達語言轉遞諸物及書簡出入者罪之七月甲辰更定尚藥儀  
鸞局學者格丙辰久雨令大興府祈晴八月己巳獵于近郊壬  
申獵于香山甲戌以皇嗣未立命有司祈于太廟庚辰還宮九

月庚寅朔天壽節敕宣徽院官凡致仕宰執悉名與宴己亥如  
薊州秋山十月丙寅還京甲申初置審官院乙未敕京府州縣  
設普濟院每歲十月至來年四月設粥以食貧民庚戌命有司  
祈雪十二月李氏進封元妃辛酉更定考試隨朝檢知法條格  
從右補闕楊庭秀請類集太祖太宗世宗三朝聖訓以時觀覽  
仍詔增熙宗爲四朝癸未增設國史院女直漢人同修史各一  
人五年正月乙未從尚書省言更定科舉法會試取策論詞  
賦經義不得過六百人合格者不及其數則闕之丙申如春水  
諭點檢司車駕所至仍令百姓市易二月辛未還宮辛巳詔應  
奉翰林文字溫廻罕天典與其兄直學士思齊同條定撰制誥  
文字不須迴避仍爲定制丁未上是楊庭秀言令及第左右官  
一人應入史事者編次日曆或一月或一季封送史院仍令送



著作局潤色付之三月庚申大睦親府進重修玉牒定皇族收  
養異姓男爲子者徒三年姓同者減二等立嫡違法者徒一年  
壬戌命有司禱雨癸亥雨尚書孫鏗大理卿完顏撒剌國子司  
業蒙括仁本名對便殿丙寅如萬寧宮戊辰定本國婚聘禮居  
祖父母父母喪并妻亡服內婚娶聽離制丙子上諭尚書省宰  
相豈可止徇人情要當重惜名爵所擬商州同知蒲察西京爲  
濟南府判官此人不堪朕常記之止與七品足矣辛巳改山東  
東路舊皇城猛安名曰合里歌阿隣四月丙午尚書省進律義  
五月乙卯朔雨足遣使報祭丁巳定策諭進士及承廩人試弓  
箭格敕重五拜天服公裳者拜禮仍舊諸便服者並用女直拜  
已未敕諸路按察司糾察親民官不許以大杖箠人庚辰地震  
詔定進納官有犯決斷法六月乙巳遣有司祈晴望祭嶽瀆七

月乙卯朔以晴遣官報謝諸神八月壬辰幸香山乙未還宮庚申更定鎮防軍犯徒配役法九月癸亥如秋山十月庚寅還京庚子宋遣使來告孝宗哀以工部尚書烏古論朮等爲弔祭使辛丑集百官于尚書省問問者亢旱近則久陰凡政有錯謬其各以所見對十一月乙卯以國史院編修呂卿雲爲左補闕兼應奉翰林文字審官院駁以資淺上諭之曰明昌間卿雲嘗上書言宮掖事辭甚切直皆他人不能言者卿輩蓋不知也臣下言事不令外人知乃是謹密正當顯用卿宜悉之己巳宋復遣使來告光宗哀以河南路統軍使克等爲弔祭使十二月癸未朔詔改明年元

泰和元年正月壬戌宋遣使獻先帝遺留物己巳從太府少監孫復上言方今入仕者三萬七千餘員而門廕補敘居三之二

諸司待闕動至累年蓋以補廢猥多流品混淆本末相舛至於  
進納之人既無勞績又非科第而亦廢及子孫無所分別欲流  
之清必澄其源乃更定廢敘法而頒行之尚書省奏今杖式輕  
細民不知畏請用大杖詔頒銅杖式不許過五分庚午如長春  
宮春水二月丁未還京三月壬申幸天長觀癸酉如萬寧宮乙  
亥宋遣使來報謝四月甲辰詔諭契丹人戶累經簽軍立功者  
官賞恩例與女直人同仍許養馬爲吏五月甲寅擊毬于臨武  
殿令都民縱觀壬戌幸玉泉山六月己卯幸香山辛卯祈雨已  
亥諭尚書省申明舊制舉行風俗奢僭之禁凡猛安謀克每戶  
田四十畝鬻者有禁樹桑一畝毀者有刑按察司以時勸督但  
有汗菜園乏并坐所臨長吏有故慢者量決罰之仍減牛頭稅  
三之一乙巳詔推排西北京遼東三路人戶物力許諸科徵鋪

馬黃河夫軍須等錢折納銀一半願納錢鈔者聽丁未詔有司  
修蓮花漏七月辛酉禁放良人不得應諸科舉子孫不在禁限  
乙丑更定右選注縣令丞簿格九月戊申朔更定瞻學養仕法  
生員給民佃官田人六十畝歲支粟三十石國子生人百八畝  
歲給以所入官爲掌其數甲寅如秋山丙子還宮十月乙酉給  
享于太廟壬辰御史臺奏在制按察司官比任終遣官考覈然  
後尚書省命官覆察之今監察御史添設員多宜分四路巡行  
每路女直漢人各一同往從之壬寅敕有司購遺書宜償其價  
以廣搜訪藏書之家有珍惜不願送官者官爲謄寫畢復還之  
仍量給其直之半十一月辛亥敕尚書凡役衆勞民之事慎勿  
輕行丁巳諭工部比聞懷州有橙結實官吏檢視擾民今復進  
柑必致重擾其誠所司遇有則進無則已十二月辛巳敕改原

廟春秋祭祀稱朝獻丁酉司空襄等進新定律令敕條格式五

十二卷詔頒行之

二年正月乙卯始朝獻于衍慶宮

每歲五次後咸

不庚申幸芳苑觀燈甲戌如建春宮二月戊戌初置內侍寄祿

官乙巳還宮三月甲寅初置宮苑司都同監各一人四月庚辰

幸昇國長公主第問疾癸卯如萬寧宮命有司祈雨五月戊申

如泰和宮改名曰慶寧長樂川曰雲龍辛亥初薦新于太廟壬

戌諭有司金井捺鉢朕留不過二三日所止一涼屢足矣若加

修治徒費人力其藩籬不急之處用圍幕可也已已敕御史臺

京師非廟及巡幸所過州縣止令灑掃不得以黃土覆道違者

糾之六月辛卯諭尚書省諸路禾稼及雨多寡令州以聞七月

辛亥有司奏還宮日請用黃麾杖不許八月丙申鳳凰見于磁

州武安縣鼓山石聖臺詔中外丁酉皇子生九月甲寅以拱衛

直都指揮使完顏瑋等爲賀宋生日使戒以兩國和好汝不宜  
爭細故傷大體十月丙戌獵于近郊十一月甲辰頒詔中外更  
定國運爲土德臘用辰十二月癸酉皇子晬日放僧道戒牒三  
千戊寅冬獵丁酉還都冬無雪 三年正月癸酉遣官祈雪于  
北嶽庚辰如建春宮二月癸丑還宮三月庚辰如萬寧宮甲午  
如玉泉山四月乙巳禘于太廟丁巳敕有司祈雨頒土龍法五  
月壬午拜天射柳上三發三中四品以上官侍宴魚藻殿以天  
氣方暑命兵士甲者釋之辛卯皇子葛王薨丙申作太極宮六  
月壬寅詔選聰明方正之士修起居注詰點檢司諸親軍所設  
教授其法何如及授業人通大義者有幾各具以聞壬戌遣官  
行視中都田禾雨澤分數七月庚辰獵于近郊丁亥上諭宰臣  
凡奏事朕欲徐思或如已者若除授事可竣三五日再奏餘並

二十日奏之八月庚申命編修官左客克宮教賜銀幣九月壬辰詔定千戶謀克受隨處捕盜官公移盜急不卽以衆應之者罪有差十月庚申完顏匡等進世宗實錄上降座立受之壬戌奉御完顏阿魯帶使宋還言韓侂冑市馬厲兵將謀北侵上怒以爲生事笞之五十出爲彰德府判未幾果實仍擢安國軍節度副使丁卯諭尚書省自今士庶陳言可悉令詣闕量與食直給居官舍其言切直及繫利害重者並三日內聞奏十一月丁丑冬獵獲兔以薦山陵十二月己酉賜天長觀額爲太極宮辛亥詔諸親王公主每歲寒食十月朔聽朝謁典裕二陵忌辰亦如之癸丑詔遣監察御史分按諸路必女直與漢人偕戊午敕行宮名曰光春其朝殿曰蘭皋寢殿曰輝寧四年正月辛未如光春宮春水壬申陰霧水冰辛卯高麗嗣子諲遣使來告其

父暉哀二月乙未朔還宮丁酉山東河北旱詔祈雨東北二獻  
庚戌親祀三皇五帝四王從尚書省奏前代帝王合致祭者若  
夏太康殷太甲太戊武丁周成王康王宣王漢高祖文景武宣  
光武明帝章帝唐高祖文皇一十七君併遣官祭之三月丁卯  
日昏無光大風毀宣陽門鵠尾癸酉命大興府祈雨戊寅幸太  
極宮乙酉親禱北郊并社稷太廟丁亥如萬寧宮遼陽府判官  
斜卯劉家以上書論列朝臣削官罷之四月庚子增定關防姦  
細格丙午定衣服制甲寅久旱下詔責躬求言避殿減膳徹樂  
省御廐馬免州縣徭役及今年夏稅遣使審繫囚理冤獄乙卯  
宰臣上表待罪詔答朕德有衍上天示異卿等各趨乃職思副  
朕懷戊午遣西上閣門使張偁等爲高麗敕祭使東上閣門使  
石慤等爲慰問并起復橫賜使壬戌萬寧宮端門災五月乙丑



有司請雩祀詔三禱嶽瀆社稷宗廟不雨乃行之甲戌雨乙亥  
百官表賀復御殿如常儀乙酉報謝諸神六月乙巳始祭中霤  
壬子司天臺長行張翼進天象傳七月庚午幸望京甸壬申如  
萬寧宮甲戌罷限錢法八月庚子詔完顏綱喬宇宋元吉等編  
類陳言文字其言涉宮庭若大臣省臺六部各以類從凡二千  
卷尚書省奏河南府盧顯達汝州王大材所陳言涉不遜情理  
切害請論其罪從之丁巳幸太極宮弛園場遠地禁縱民耕捕  
樵採減教坊長行文繡署女工各五十人出宮女百八十人九  
月丙寅如薊州秋山十月甲午定私釀法癸卯還宮十一月癸  
酉雨木冰凡三日十二月己丑朔新平等縣好畛蟲生辛丑敕  
陝西河南饑民所鬻男女官爲贖之五年正月己未朔大雪  
乙丑幸太極宮丁卯如光春宮春水乙亥詔有司自太和三年

郡縣三經行幸民嘗供億者賜今年租稅之半丁丑次霸州調  
山東河北軍夫改治漕渠二月己丑朔諭各路按察司限於近  
制各務因循莫思舉刺郡縣以貪黷相尚莫能畏戢自今若糾  
察得實民無冤滯能使一路鎮靜者爲稱職其或煩索使民不  
得伸愬者是爲曠廢己亥如建春宮三月乙丑宋兵入秦川界  
辛巳又入鞏州來遠鎮唐州諜報韓侂冑屯兵鄂岳將謀北侵  
四月癸巳命樞密院移文宋人依誓約撤新兵毋縱入境五月  
甲子拜僕散揆河南宣撫使籍諸道兵以備宋甲申宋兵破連  
水縣六月戊子復之甲寅召諸大臣問備宋之策皆以設備養  
惡爲言上以南北和好四十餘載民不知兵不怨先發七月戊  
辰如錦屏山壬申朝獻于衍慶宮乙亥宣撫司奏定姦細罪賞  
法宋將郭倪與濠州守臣田俊邁誘虹縣民蘇貴等爲間利其

賄賂反爲遊說及聞行臺之建皆畏讐不敢進八月辛卯從揆  
請罷宣撫司九月戊子西北方黑雲間有赤氣如火色次及西  
南正南東南方皆亦有白氣貫其中至中夜赤氣滿天四更乃  
散戊戌宋兵三百攻比陽寺莊副巡檢阿里根寺家奴死之甲  
辰宋人焚黃澗掠巡檢高顯十月丁丑宋人襲比陽唐州軍事  
判官撒覲死之十一月乙酉宋人入內鄉攻洛南之固縣商州  
司獄壽祖追至丹河擊敗之丁酉詔山東陝西帥臣訓練士卒  
以備非常分給邊帥銀十五萬兩募民偵伺復遣武衛軍副都  
指揮使完顏太平殿前右衛副將軍蒲察阿里赴邊伺其入伏  
兵掩之六年正月丁亥宋使陳克俊等賀正己畢朝辭遣御  
史中丞孟鑄就館諭曰大定初世宗皇帝許宋世爲姪國朕遵  
守遺法和好至今豈意爾國屢有盜賊犯我邊境以此遣大臣

宣撫河南軍民及得爾國有司公移稱已罷黜邊臣抽去兵卒  
朕方以天下爲度不介小嫌罷宣撫司未幾盜賊甚于前日比  
來羣臣屢以爾國渝盟爲言朕惟和好歲久委曲涵容恐姪宋  
皇帝或未詳知若依前不息雖兼愛生靈豈能終已卿等常以  
朕意具言之汝主丙申宋興元守將吳曦遣兵圍抹熟龍堡部  
將蒲鮮長安擊走之斬其將丁未如春木庚戌宋人入撒牟谷  
陝西統軍判官完顏摑刺鞏州兵馬鈐轄完顏七斤約宋西和  
州守將會境上俄伏發爲所襲木波部長趙彥雄等七人死焉  
摑刺馬陷淖中中流矢七斤僅以身免二月甲戌詔按察司既  
差監察體訪復遣官覆察誠爲繁冗自今差監察時卽別遣官  
與俱更不覆察明昌初奉御蒲察五斤出使山東因河間百姓  
饑移提刑司開倉賑之還具以聞時上初臨政太傅徒單克寧

言不宜假近侍人權乃治其專擅之罪杖之二十至是上思之  
由泰州都監召爲右振肅已酉宋人攻靈壁四月丙辰圍壽春  
告急于亳州防禦同知賢聖奴將步騎六百赴之乃退癸亥河  
南統軍使紇石烈子仁等遣嚴整圖忠周秀輩入襄陽覘敵還  
言皇甫斌兵四萬規取鄧州以叛人田元爲鄉導三萬人規取  
唐州以張貞張勝爲鄉導俱授統領官胡命聚鄭汝陽翟之兵  
于昌武統以南京副留守兼兵馬副都總管紇石烈毅聚亳陳  
襄邑之兵于歸德統以河南路副統軍徒單鐸子仁自以所部  
兵駐汴其山東兩路軍七千駐大名河北東西路軍萬七千屯  
河南咸給以馬易其老弱者時知鳳翔完顏昱平涼同知蒲察  
秉鉉分駐鳳翔諸隘乾州刺史完顏思忠扼六盤陝西副都統  
幹勒牙刺京兆惟官蒲察秉彝戍號華扼潼關蒲津陝西都統

完顏忠京兆同知烏古論兒州守京兆要害以鳳翔臨洮路替

漢弓箭手及緋關翅軍散錄邊陲緋關翅軍名也元帥右監軍蒲察貞

分總其事甲子宋人攻天水界乙丑入東柯各部將劉鐸戰敗

之內寅仍詔揆領行省于汴許以便宜升諸道統軍司爲兵馬

都統府盡徵諸道兵授乾石烈執中山東西路兵馬都統使定

海軍節度使完顏撒剌副之完顏克爲陝西五路兵馬都統使

知臨洮府石林仲溫副之皆聽揆節制辛未職攻來遠鎮之蘭

家嶺丙子詔內外各照官職納馬丁丑宋人入新息內鄉又入

泗州戊寅入褒信己卯入虹縣庚辰入潁上五月壬午宋李璣

圍壽州俊邁入蘄縣秦詵攻蔡州防禦使完顏佛住敗之又入

金城海口殺長山尉執二巡檢以去丙戌遣告天地太廟社稷

宋叛盟出師丁亥親告于衍慶宮戊子加揆兼左副元帥完顏

臣右副元帥克與蒲察貞爲右都監知真定府烏古論誼爲左都監辛卯以南征詔中外賜唐州刺史吾古孫兀屯總押鄧州軍馬事完顏江山爵各二級蔡州防禦使完顏佛住爵一級授嚴整嵩州巡檢使賜爵八級錢二百萬餘賞賚有差上以宋兵方熾東北新調之兵未集河南之衆不足支命河北大名北京天山之兵萬五千屯真定河間清獻等以爲應壬辰諭尚書省今國家多故凡言軍國利害五品以上官以次奏陳朕將親問之六品以下具帖子進癸巳山東路災赦死罪已下宋田俊邁攻宿州安國軍節副納蘭邦烈等出兵擊之因中流矢宋郭倬李汝翼以衆繼至遂圍宿州壬寅復爲邦烈等擊敗俊邁退保于蘄癸卯執之甲辰皇甫斌攻唐州吾古孫兀屯拒之行省遣泌陽副巡檢納合軍勝來援遂擊敗之六月辛亥朔揆遣人報

捷并送俊邁赴闕降詔褒諭賜紇石烈貞并邦烈史屹搭等爵賞有差宋將李爽圍壽州刺史徒單義拒守踰月不能下壬子河南統軍判官乞住及買哥等以兵來援義出兵應之爽大敗與其副田林僅脫身而去餘兵赴淮者衆脫者纔十之四丁巳詔彰德府朱韓侂冑祖琦墳毋得損壞仍禁樵採庚申右翼都統完顏賽不敗宋曹統制于溱水辛酉詔有司凡宋宗族所居各具以聞長官常加提控壬戌平章揆遣人報壽州捷戊辰詔升壽州爲防禦以義爲使免今年租稅諸科名錢釋死罪以下擢乞住昌武軍節度同知買哥河南路統軍判官都統賽不副統蒲鮮萬奴各進爵一級賜金幣有差辛未木星晝見至七月戊申經天乙亥曦兵六千攻鹽州鞏州戍將完顏王喜隊校僕散六斤猛安龍延常擊走之斬首二百級七月癸未宋商榮攻



東海縣令完顏卞僧復敗之還中伏矢死贈海州刺史給其家銀五百兩絹百匹仍官一子甲午宋統制戚春以舟師攻邳州刺史完顏從正敗之春赴水死斬其副夏統制八月庚戌山東帥來報邳州之捷乙亥赦唐鄧潁蔡六州免來年租稅三分之一九月詔安慰陝西畧曰京兆鳳翔臨洮三路百姓因被宋兵逼脅或背國從僞沒落外境若能自歸者依舊各令復業元拋地土依數給付其受宋人旗榜結構等值時驚擾因而避役逃亡未發覺者許令所在官司陳首並行釋免更不追究軍前可用之人隨宜任使限外不首復罪如初辛未宋程松遣將曲昌世襲方山原自率兵數萬分道襲和尚原西山寨龍門等關是日大霧四塞旣而暴雨戍兵不知其來松遂據之蒲察貞遣行軍副統貴滿阿里隴州同知完顏孛論伏兵千人方山原下萬

已與屯撤合門美原縣令木虎合沓別將壯士五百取關道潛  
登出宋兵上自高而下宋兵大駭伏兵合擊遂破之貞乃分遣  
合沓部將完顏出軍奴率兵千人出黃兒谷取和尚原會州同  
知女奚列南家押軍猛安粘割撤改率兵千人出大寧谷取西  
山寨貞自以兵七百出中路取龍門等關時已焚閣道且修且  
進至小關松將楊廷據險注射貞不得前復令阿里爲疑兵潛  
遣猛安胡信率甲士五十繞出其後反擊宋兵大亂就陣斬廷  
衆走二里關復敗宋將彭統導領走龍門追擊大破之合沓乘  
夜潛登和尚原絕頂宋人驚以爲神皆散走破其衆二千生獲  
數十人南家斬木開道以登西山再與宋兵遇皆敗之遂盡復  
故地乙酉戌夜北方有赤白氣數道起于王良之下行至北斗  
開陽搖光之東庚寅敕行尚書省有方畧出衆武藝絕倫才幹

辦事工巧過人者其招選之戊戌左丞僕散端行省于汴己亥  
戶部侍郎梁鎰行六部尚書事於山東辛丑夏國王李純祐廢  
遣左司郎中溫迪罕思敬冊其姪李安全爲夏國王甲辰驍將  
馮興楊雄李珪等入秦州承裕等又擊破之斬雄珪十月戊申  
朔揆督諸道進兵行省兵三萬出潁壽河南路子仁兵三萬出  
渦口匡兵二萬五千出唐鄧執中兵二萬出清口克兵一萬出  
陳倉貞兵一萬山成紀完顏綱步騎一萬出臨潭仲溫步騎五  
千出鹽川完顏璘五千出來遠十一月壬午匡攻下棗陽取隨  
州遂攻襄陽破其外城丁亥揆克安豐軍取霍丘克含山次廬  
江執中克淮陰遂圍楚州綱圍祐州下荔川閭川等城子仁克  
定遠縣滁州下來安全椒貞克天水宕昌西和州壬辰宋督視  
江淮兵馬事丘密遣劉祐來乞和庚子日斜有流星二光芒如

炬幾及一丈起東北沒東南癸卯密復遣林拱宋顯等以書幣  
乞和十二月丁未朔匡復克宜城揆攻和州壬子貞又克成州  
綱次大源縣降之癸丑宋吳曦納款于綱戊午克攻下大散關  
遣元顏抄合下鳳州己未子仁克真州密復遣陳壁等奉書乞  
和乙丑元帥揆班師戊辰綱以朝命假太倉使馬良顯齎詔書  
金印立曦爲蜀王詔畧曰威畧震主者身危功蓋天下者不賞  
卿家專制蜀漢積有歲年猜嫌旣萌進退維谷君臣之義已同  
路人譬之破桐之葉不可復合騎虎之勢難以中下朕每一思  
之未嘗不當憤歎息而卿猶偃然自安且卿自視翼贊之功孰  
與岳飛一旦見忌遂被參劾之誅故智者順時而動明者因機  
而發比年趙擴昏辱受制強臣頗違誓約增屯軍馬招納叛亡  
失道如此亡不旋日朕已分命虎臣臨江問罪長驅並駕飛渡

有期此正豪傑分功之秋卿以英偉之姿處危疑之地必能深  
識天命洞見事機若按兵閉境不爲異同使我師併力巢穴而  
無西顧之虞則全蜀之地卿所素有當加封冊一依先朝故事  
更能順流東下助爲犄角則旌麾所指盡以相付天日在上朕  
不食言已已曠遣果州團練使郭澄提舉仙人關使任辛奉表  
及蜀地圖志吳氏譜牒來上答以誓詔壬申朝辭諭以汝主立  
國日淺恐宋兵侵軼人心不安凡有當行事務移文與綱計議  
或有緊急卽差人講究大定間嘗因事入覲今亦多歲懷想不  
忘欲得其繪像親如見面可俟封冊使回日附進 七年正月  
戊寅敕宰臣舉材幹官同議南征事辛巳詔御史大夫崇勳同  
判大睦親事徒單懷忠吏書范楫戶書高汝礪禮書張行簡知  
大興府溫迪罕思齊等十有四人同對于慶和殿壬午復詔百

官同對于廣仁殿庚寅揆還駐下蔡有疾代以左丞相崇治己亥有司奏更定茶禁辛丑匡取穀城二月丙辰赦鳳成西和階山五州宋知樞密院張巖遣方信孺以書詣揆端乞和己未匡克荆門軍癸亥吳曦遣使三奉表來謝封爵陳誓言且賀全蜀內附親王百官稱賀癸酉遣木虎高琪翰林直學士喬宇冊曦爲蜀國王是月曦復被誅詔贈太師命德順州刺史完顏思忠招魂葬于水洛縣以族兄吳端子爲曦後三月戊子幸太極宮庚寅詔撫諭陝西軍士壬辰宋復攻破階州癸巳破西和州乙未綱至鳳翔詔撤五州之兵分保要害庚子詔諸軍還以近侍局直長爲四川安慰使四月癸丑宋又乘蒲察貞撤黃牛戍遂攻破散關鞏州鈐轄完顏阿失死之戊辰詔元帥府分遣諸將遊奕淮南諸州癸酉復下散關五月丙申宋張巖復遣信孺以

書至增幣乞和安丙遣李孝義率步騎三萬攻秦州圍皂角堡高琪以兵赴之七戰而解其圍六月乙巳朔詔朝官六品外官五品以上及親王舉通錢穀官一人攝侍御史王維翰奏事殿中帝稱曰嘉卽以授之河南旱蝗詔維翰體究田禾分數以聞七月庚辰雨復詔維翰雨雖霑足秋種過時使多種蔬菜猶愈于荒萊也蝗蝻遺子如何可絕舊有蝗處諭百姓使知來歲宜種麥壬午詔民間交易典質一貫以上並用交鈔毋用錢八月戊申宋張巖復遣信孺齎其主誓書來乞和十月己巳詔定隨軍遷賞及南征將士功賞格辛未陝西宣撫使徒單益分遣新道口副統把回海攻下蘇嶺關十一月癸酉都統押剌拔鶻領關把回海取小湖關敖倉進至營口鎮遂取其城丙子侂冑遣王恂以書來乞和再稱伯復增歲幣犒軍錢誅蘇師旦函首

以獻丙戌尚書省奏陝州防禦使紇石烈孛孫禁民輟罪之壬  
辰宋錢象祖以誅侂冑後書行省詔完顏匡檄于宋函首以  
贖淮南故地十二月壬寅朔翰林直學士陳大任修遼史成詔  
新定學令削去薛居正五代史止用歐陽修所撰丙午詔策論  
進士免試弓箭擊毬八年正月癸酉詔收毀大鈔行小鈔乙  
亥宋安丙遣兵襲鶴嶺關把回游摑刺擊走之斬其將景統領  
丙子左司郎中劉昂通州刺史史肅監察御史王宇吏部主事  
曹元員外郎徒單永康太倉使馬良顯順州刺史唐括直思白  
坐與蒲陰令太中私議朝政皆杖之癸未如春水丙戌如光春  
宮二月乙巳宋錢象祖遣王柝請川陝開隘甲寅如建春宮庚  
申諭有司時方農作雖在禁地亦令耕種己巳還宮三月庚寅  
諭尚書省與宋和上問宋人復能背盟否右司郎中王維翰對



曰宋主怠于政事南兵佻弱兩淮擾後千里蕭條其臣憊侂冑  
師旦無復敢執其咎者不足憂也四月癸卯日暈三重皆內黃  
外赤戊申禘于太廟庚戌如萬寧宮甲寅敕尚書省北邊無事  
東北路招討司還治泰州就兼節度使其副招討仍置于邊詔  
論有司以苗稼方興宜速遣官分道巡行農事以備蟲蛇間月  
辛未上諭宰臣翰林侍讀學士蒲察畏也言宋遄謝使雖未到  
闕當先擇報聘人其言甚當此方更始之際凡有禮數皆在奉  
使自後永爲永例不可不慎甲午雨雹五月丁未御應天門備  
黃麾立仗親王文武合班起居上表稱賀遣戶書高汝礪禮書  
張行簡奏告天地武衛都指揮徒單鏞告太廟御史中丞孟鑄  
告社稷尚書省宣露布懸宋賊臣韓侂冑蘇師旦首于通衢漆  
而藏之軍器庫頒詔天下己未更元帥府爲樞密院癸亥移天

壽節於十月十五日六月癸酉宋通謝使禮部尚書許奕右武衛上將軍吳衡等奉其主書入見甲戌謁謝于衍慶宮癸未以許宋平詔中外免河南山東陝西等六路今年夏稅河東河北大名等五路半之戊子飛蝗入京畿詔遣使分路捕之丁酉以副都點檢完顏侃爲宋諭成使禮部侍郎喬宇副之七月詔頒捕蝗圖于中外戊申宋使朝辭答書通謝并致誓書八月壬申更定遼東行使鈔法癸酉如建春宮庚寅如秋山九月甲子遣吏部尚書賈守謙等一十三人分詣諸路與各路按察司官推排民戶物力上名見香閣諭以除推收外其銷之者當盡除之如一戶元物力三百貫今蠲減二百五十貫猶不能當新強者如一戶三百貫勿添盡量存氣力止添二百貫卿等宜各用心十年之間百姓應當賦役利害非細苟不稱所委治罪當不輕

也十一月丁酉朔詔諸路按察使並兼轉運使初設三司使掌判鹽鐵度文勸農事以樞密使紇石烈子仁兼之癸卯詔戒諭尚書省國家之治在於紀綱紀綱所先賞罰必信今乃上自省部之重下逮司縣之間律度非循私懷自便遷延曠歲苟且成風習此爲恒從何致理朝廷者百官之本京師者諸夏之儀其妨自今各懲已往遵繩奉法竭力赴功無枉撓以循情無依違而避勢壹歸于正用範乃民是日御臨武殿試護衛丁未敕諭臨潢泰州路兵馬都總管承裔等修邊備乙卯帝不豫丙辰崩于福安殿年四十一大安元年正月諡曰憲天光運仁文義武神聖英孝皇帝廟號章宗二月甲申葬道陵帝在位二十年承世宗治平日久宇內小康乃正禮樂修刑法定官制典章文物粲然成一代治規又數問侍臣漢宣綜核名實唐代考課之

法蓋欲跨遼宋而比跡于漢唐羣臣內外上事章數十上請正尊號固却不受以終其身亦可謂有志於治者矣然婢寵擅朝冢嗣未立疏忌宗室傳授匪人向之所謂維持鞏固於久遠者徒爲文具而不得爲後世子孫一日之用金源氏從此衰矣

弘簡錄卷二百十七

終

弘簡錄卷二百十八

明刑部員外郎仁和弘齋邵經邦學

皇清翰林院侍講學士四世孫遠平校閱

載記 金主之七

衛紹王諱允濟小字興勝以避顯宗諱改允爲永乃世宗第七子母元妃李氏王長身美髯天資儉約不好華飾初封薛王進滕王大定十七年授世襲猛安二十五年加開府儀同三司二十六年爲祕書監明年轉刑部尚書又明年改殿前都點檢章宗初進封潞王起復判安武軍節度使五月至冀州到任表謝賜詔優答進封韓王明昌四年改判興平軍五年轉沁南軍承安二年封衛王三年改昭義軍泰和元年判彰德府五年判平陽府又改武定軍節度使初章宗誅鄭王永蹈趙王允中久頗

悔之八年十一月衛王入朝時章宗已感嗽疾因無繼嗣其諸叔并兄弟雖存意皆不在惟愛王柔弱鮮智能故獨留之王自以承路母弟堅辭欲行上力疾與之擊毬因語王曰叔不欲作王人遽辭去耶無何大漸王尚未發李氏及黃門李新喜平章完顏匡定策傳遺詔畧曰皇叔衛王承世宗之遺體鍾厚慶於元妃人望所歸曆數斯在今朕上體太祖皇帝傳受至公之意付畀寶祚卽皇帝位於樞前衛王固讓再三始承詔舉哀明日羣臣朝見于大安殿詔路府州縣爲大行皇帝服七日

大安元年正月辛丑飛星如火起天市垣有尾跡若赤龍壬戌改元大赦立元妃徒單氏爲皇后二月乙丑朔太白晝見經天壬辰詔曰章宗皇帝以天下重器畀于眇躬遺旨掖庭內人有娠者兩位如其中有男則立爲儲貳如所生皆男則擇其可立

者立之申諭多方皎如天日朕思克副遺意曲爲盡心昨聞有  
爽于安養朕憂念不置軫懷靡寧告于先帝願降靈祉默賜保  
全早生聖嗣甲午命欽懷皇后母鄭國公主及乳母蕭國夫人  
守視大臣專爲調護丁酉平章僕散端左丞孫卽康奏言賈氏  
當以十一月免乳今已出三月范氏產期合在正月而太醫副  
使儀師顏言自年前十一月診得范氏元氣有損調治迄今脉  
息雖和胎形已失及范氏自願於神御前削髮爲尼庚子封皇  
子六人爲王三月甲辰道陵禮成大赦詔自今於朕名不連續  
及呆詠等字不須別改五月宋與高麗遣使來賀卽位七月幸  
海王莊臨奠魯國公主八月帝生日爲萬秋節各遣使來賀九  
月如大房山謁奠睿裕道三陵百官表請建儲不允十月歲星  
犯左執法已卯詔戒勵風俗十一月平陽地震有聲如雷自西

北來壓死民口甚衆十二月詔一戶三人死者免租稅一年二人及傷者免半年貧民給葬錢五千傷者三千二年正月庚戌朔日中有流星出大如盆其色碧向西行漸如車輪尾長數丈没于蜀中至地復起光散如火二月客星入紫微垣光散爲赤龍地大震有聲如雷四月校大金儀禮北方有黑氣如大道東西亘天徐邳州河清五百餘里以告宗廟社稷五月詔儒臣編續資治通鑑六月大旱下詔罪已振貧民闕食者曲赦西京太原兩路雜犯死罪減一等徒以下免丙寅地震至七八月不止乙丑立子胙王從恪爲皇太子丁卯獵于近郊戊辰夏人侵葭州九月地大震乙未詔求直言招勇敢撫流亡庚子遣使慰撫宣德行省軍士丙午京師戒嚴上日出巡撫百官請視朝不允辛亥宣德行省罷癸丑詔撫諭中都西京清倉被兵民戶十



一月獵于近郊中都大悲閣東渠內火自出逾旬乃滅閣南剎竿下石罅中火自出人近之卽滅俄復出如是者復旬日中都火歟民居是歲大饑禁百姓不得傳說邊事三年正月乙酉朔焚惑入氏中宋高麗夏遣使來賀二月焚惑犯房宿有大風從北來發屋折木通玄門與東華門重閣俱折閏月焚惑犯鍵閉星三月大悲閣災延及民居有黑氣起北方廣長若大堤內有三白氣貫之如龍火狀詔括民間馬令職官各出有差四月大元兵起遣西北路招討使粘合合打乞和不許六月壬寅更定軍前賞罰格八月獎諭行省官獨吉思忠完顏承裕等河南大名路軍逃歸下詔招撫之九月思忠承裕敗績于會河堡全軍皆覆居庸關失守萬戶低頭屯古北口禁男子不得輒出中都城門大元前軍至中都中外戒嚴十月每夜初更正東西北

天明如月初出經月乃滅熒惑犯壘壁陣上京留守徒單鎰遣同知烏古孫兀屯將兵二萬衛中都上巡撫諸軍十一月殺河南陳言人郝贊右丞相鎰發中都在城軍時德興弘州昌平懷來緝山豐閏密雲撫寧集寧東過平灤南至清滄由臨潢過遼河西南至忻代皆歸大元十二月簽陝西兩路漢軍五千人赴中都太保張行簡丞相僕散端宿禁中議軍事

崇慶元年正月朔改元赦宋夏遣使來賀三月大旱遣使問李遵頊爲夏國王夏人犯葭州延安路兵馬總管完顏奴婢禦之五月簽陝西勇敢軍二萬人射糧軍一萬人赴中都括陝西馬詔賣空名勅牒河東陝西大饑斗米錢數千流莩滿野以南京留守僕散端爲河南陝西安撫使提控軍馬七月有風自東來吹帛一段高數十丈飛動如龍形墜於拱辰門八月萬秋節以

兵事不設宴十月曲赦西京遼東北京十一月賑河東南路南  
京路陝西東路山東西路衛州旱災十二月夏遣使謝封冊

至寧元年正月遣官振河東陝西饑二月詔撫諭遼東三月太  
陰太白與日並見相去尺餘五月改元詔諭咸平路契丹部人  
復起嘯聚者六月陝西大旱夏人犯保安州殺刺史又犯慶陽  
府殺同知七月以刑部尚書王維叅知政事八月戊子大霧晝  
晦治中福海別將兵屯城北辛卯胡沙虎矯詔以誅反者爲名  
招福海執而殺之奪其兵壬辰遂作亂叩東華遣人呼守直親  
軍百戶冬兒五十戶蒲察六斤不應許以世襲猛安三品官職  
亦不應都點檢徒單鎬繼而出護衛斜烈乞兒親軍春山共搃  
鏢啓門胡沙虎以兵入宮盡逐衛士代以其黨癸巳逼帝出宮  
載以紫車囚之故邸以武衛軍二百人錮守之遣黃門入收符

璽尚宮左夫人鄭氏端居璽所聞變拒其人曰璽乃天子所用  
汝何人敢取之黃門曰今天時大變主上猶且不保況璽乎御  
侍當思自脫計鄭厲聲罵曰若輩宮中近侍恩遇尤隆君難不  
以死報之反爲逆監奪璽耶我死可決璽必不與遂瞑目不語  
黃門出胡沙虎使宦者李思中弑帝於邸立宣宗請廢爲庶人  
詔百官二百餘人議衆相視莫敢言獨拾遺白廷秀奮然曰先  
朝素無失德在禮不當廢從之者禮書張敬甫戶部武文伯諫  
議張信甫麗才卿石抹晉卿等二十四人太保張行簡請用樊  
昌邑王晉海西公故事降爲侯侍御史完顏訛出等十人請降  
復王封胡沙虎執前議紛然不定宣宗曰譬諸問途百人曰東  
行是十人曰西行是行道之人果適東乎適西乎朕徐思之丙  
戌降封東海郡侯十月辛亥虎被高琪殺甲寅諫議張行信上

疏曰春秋之法國君立不以道若嘗與諸侯盟會卽列爲諸侯東海在位已六年矣爲其臣者誰敢干之胡沙虎握兵入城躬行弑逆當是時惟鄆陽石古乃率衆赴闕論其忠烈在朝食祿者皆當愧之陛下始親萬機海內望治亟宜褒顯延及子孫庶幾少慰貞魂激天下義氣宋徐美之弑營陽王立文帝卽位誅之亦以奉迎之功特免妻子胡沙虎國之大賊世所共惡今雖已死而罪名未正合暴其過惡先布中外除名削爵緣坐其家然後爲快陛下若不忍援立之勞則依倣元嘉故事亦足以示懲戒癸未宣宗乃下詔削虎官爵封鄭氏資明夫人凡從石古乃鄆陽戰者千戶賞錢五百貫謀克三百貫蒲輦散軍二百貫各遷官兩階戰沒者贈賞付其家冬兒加龍虎衛上將軍再遷宿直將軍蒲察六斤加定遠大將軍武衛軍鈐轄貞祐四年詔

追復衛王諡曰紹 時因亂後記注亡失史不復載逮元中統  
間翰林學士承旨王鶚采摭當時詔令故金部令史寶祥年八  
十九能記憶舊事從得二十餘條司天提點張正之寫災異十  
六條張承旨家載舊事五條楊雲翼目錄四十條陳老目錄三  
十條藏在史館今校其重複刪其繁雜畧存梗槩又於金掌奏  
目女官大明居士王氏所記得資明夫人授璽事討著于篇

載記 金主八之上

宣宗皇帝諱吾睹補顯宗庶長子母昭華劉氏大定三年癸未  
三月十三日生世宗養于宮中十八年封溫國公加特進二十  
六年賜名珣二十九年進封豐王加開府儀同三司累判兵吏  
部并永定軍承安元年進封翼王泰和五年改賜名從嘉八年  
進封邢王又封昇王判彰德軍所至著祥異紇石烈執中遣其

黨徒單銘等迎于彰德既至親王百官上表勸進九月甲辰卽  
皇帝位於大安殿加執中太師乙巳朔諭尚書省凡事規畫悉  
依世宗所斷行之羣臣若有見聞各直言勿隱丁未臨奠于衛  
王第有司奏舊禮當設坐哭上命撤坐伏哭盡哀勅有司以禮  
改葬戊申御仁政殿視朝壬子改是年爲貞祐元年大赦恩賚  
中外臣民有差丙辰左諫議張行信上言崇節儉廣聽納明賞  
罰三事上納之丙寅詔論六品以下官事有可言者言之無隱  
閏月戊辰朔拜日子仁政殿自是每月爲常庚午告天地廟社  
復舊名珣詔中外不須迴避前所更名辛未追尊皇妣爲皇太  
后是日皇妃皇子至自彰德甲申立子守忠爲皇太子甲午減  
定監察御史爲十二員十月丁酉朔元兵下涿州京師戒嚴辛  
丑元遣乙里只來壬子設京城鎮撫彈壓官並招賢所癸亥放

宮女百三十八十一月戊辰夏人攻會州徙單醜兒出兵擊走之庚午詔百官會議尚書省乞和于元癸未元兵徇河間府并滄與觀州乙未定亡失告身文憑格十二月丁酉朔上御應天門詔諭軍士仍出銀以賜之二年正月丁卯朔邊事亟免朝賀辛未元兵徇彰德府宋人攻秦州統軍使石抹仲溫擊却之癸未從有司奏權止今年禘享朝獻原廟及皇太后冊禮乙酉元兵徇益都府乙未徇懷州沁南軍節度使宋晟死之二月壬子元乙里只札八來丙辰罷按察司壬戌元乙里只復來三月辛未遣左丞完顏承暉詣元軍請和丁丑赦國內癸未大括粟庚寅詔百官議于尚書省奉衛紹王公主歸元議和是爲公主皇后辛卯詔許諸人納粟買官壬辰元兵下嵐州四月戊戌奉遷昭聖皇后柩權厝于新寺時山東河北諸郡失守惟真定清



沃大名東平徐邳海州數城僅存河東州縣亦多殘燬庚子元  
允和議兵退大赦國內命僕散安貞與兵部尚書裴滿子仁刑  
部尚書武都分道宣撫安集遺黎甲辰詔有司具陣亡人子孫  
以備錄用乙卯從尚書省奏巡幸南京已未葬衛紹王五月乙  
亥決意遷都詔告國內太學生趙昉等四百人上章極論和議  
之害朝廷大計已定不能中止慰諭遣之丙子詣原廟奉辭戊  
寅先詔諭僕散端等壬午車駕發中都丙戌次定興禁有司扈  
從踐蹂民田所踐禾稼計直酬之丁亥次安肅州完顏弼以兵  
迎見癸巳次中山府六月癸丑次內丘縣戊午次彰德府曲赦  
境內庚申次鉅橋鎮南京行宮寶鎮閣災壬戌次宜村黃龍見  
西北七月車駕至南京立元妃溫敦氏爲皇后百官上表稱賀  
庚子皇太子至詔曲赦中都路丁未夏人入邊命移文貴之甲

寅罷經畧司九月壬戌朔日食皇孫生癸亥山東路報萊州之捷庚辰詔訓練軍士丁亥太白晝見于軫戊子禁軍官團獵十月甲午詔遣官市木波西羗馬陝西軍戶戰死者給糧贍其家丁酉元兵徇順州丙辰元兵收成州諭大名行省孛術魯德裕貶損用度十一月辛未賜衛紹王家屬餼廩癸酉詔有司答夏國牒丙子許諸色人試武舉蘭州譯人程陳僧叛西結夏人爲援辛巳熒惑犯房宿鉤鈴星癸未曲赦遼東路勅罷宣撫司輒擬官十二月頒勸農詔戊戌遣真定元帥永錫等授中都丁未以和議既定聽民南渡乙卯元兵徇懿州三年正月辛酉朔宋遣使來賀壬戌遣內侍諭永錫防邊母以和議爲辭癸亥曲宴宋使及羣臣甲戌定文武五品以上侍坐員遂爲常制乙丑詔宣撫阿海總管合住討賊劉仁祖張汝楫戊辰從尚書省言

內外軍人入粟補官者多行伍浸虛請俟平定應監差者與三  
酬門戶有職事者陞一等其子弟應廢者罷之乙亥夏人犯環  
州北京軍亂殺宣撫使與屯襲曲赦其罪獎諭官吏命招撫之  
丁丑右副元帥蒲察七斤以其軍降於元中都危急詔元帥左  
監軍永錫將中山真定保涿兵一萬左都監烏古論慶壽將大  
名兵萬八千以御史中丞李英運糧大名行省叅政李术魯德  
裕調發詔曰中都重地廟社在焉宜懇往援付以空名宣勅許  
視功遷叙逗撓者治以軍律辛巳皇太子疾輟視朝乙酉薨二  
月辛卯環州刺史烏古論延壽及斜卯毛良虎等敗夏人于州  
境詔進官有差元使乙里只來勅宗臣饋以酒饌乙未改寧邊  
州隸嵐州丁酉從戶部郎中與屯阿虎請諸色人遷官並視女  
直人有司妄生分別以違制論丙午尚書省以南遷後吏部秋

冬置選南京春夏置選中都赴調者不便請併選於南京從之  
丁巳日初出赤如血欲沒復然戊年大風壞隆德殿鴟尾時河  
北殘燬官吏多求河南差占以避難三月壬戌詔文武五品以  
上辟舉州縣官不聽以他事差古仍勒終任有勞績者升以遇  
領職事應降罰者亦止本處居注有任兵戍者不可離別注以  
往丙寅勅河東河北大名長貳官訓練隨處義兵鄰境有警責  
其挾援降人自拔歸國者遷職仍列其姓名以招諭來者五品  
已上官公舉沿河州縣官罷軟不勝職任者汰去仍許今季到  
部人內先擇能者量緩急易之乙亥永錫慶壽兵至霸州北李  
英毀酒軍無紀律元兵攻之遂大敗丁丑勅遼東宣撫使蒲鮮  
萬奴選精銳屯潘州廣寧以候進止壬申立上生日爲長春節  
宋遣使來賀戊寅諭尚書省自去冬不雨雪議弛諸處碾磴以

其水溉民田已卯始雨庚辰從御史臺言在京軍官及委差官  
芻糧券劄悉同征行密院委差有俸人吏非征行不必給壬午  
山東宣撫司報大沫堦之捷夾谷石里哥及沒烈擒賊渠劉二  
祖等斬之前後殲賊萬計己丑曲赦山東路禁州縣置刃於杖  
以決罪人時京師道遠隔絕前京兆治中李友直結華州防禦  
同知馮朝河州防禦判官郝遵甫平涼府同致仕楊庭秀水洛  
縣主簿宿徽等圍集州民號忠義扈駕相挺爲亂殺其防禦判  
官完顏八斤及城中女直人以書約長勝軍都統楊珪爲府兵  
所得珪諱之請自效誘友直等執之蹙所招千餘人納仗阬諸  
城下安撫司以便宜族友直等事聞增八斤及被害官軍十餘  
人各一官贖錢三百貫珪伏誅四月丙申河南路蝗遣官分捕  
上諭宰臣朕在潛邸聞捕蝗者止及道傍使者不見處卽不加

意當以此意戒之又言舊制夏至後免朝四日一奏事此在平時可已方今多故勿憚朕勞但使國事無廢則善矣癸卯籍赴選監當官爲軍乙巳罷南京行六部尚書曲赦蒲察七斤脅從黨與募能殺獲者以其官官之丙午以調度不給罷隨朝六品以下官奉應輸備錢減經兵州府縣官吏及脩內軍夫有祿人被差不出本境者竝罷給券出境者以其半給之丁未啓故皇太子啟權葬迎朔門外諡曰莊獻壬子遣使同山西宣撫司招撫軍民選其民勇健者爲軍仍降詔諭有司勿拒河北避兵之民所至加以存卹檢覈朝廷差遣官券曆無故稽留中道者罪之中都破壬戌降空名宣勅紫衣師德號度牒以補軍儲辛未立守忠子鏗爲皇太孫數月天諡曰冲懷辛巳上諭宰臣多事之秋陳言者朕於宮中置局命方正官數員擇可取者付出施

行戊子謀伐西夏遣大臣鎮撫京兆七月戊午朔元兵收濟源縣已未徵弓箭于內外品官三品以上三副四品五品二副餘以等級徵之丁憂致仕者免庚申置陳穎漕運提舉官以戶部勾當官往來督察是夕有星如太白色青白有尾出紫微垣北極傍入貫索中辛酉詔河間孤城移其軍民就粟清州河北郡縣軍須並減河南之半壬戌括民間騾付諸軍與馬叅用癸亥定尚書所造諸符樞密院鹿宜撫司魚都統司虎甲戌借平陽民租一年命裁損宮中歲給減致仕官俸給之半丁丑肅宗與明德皇后神主至自中都奉安于明俊殿戊寅月入畢宿戊夜犯畢大星甲申改交鈔名貞祐寶券八月戊子朔以陝西統軍使完顏合打簽樞密院事己丑制軍府庶事樞密院官須與經歷官裁決經歷議是而院官不從許直以聞癸巳詔遣官體究

京西路新遷軍戶壬子置行省于陝西乙卯增汾河關羅之法  
十取其八以抑販粟之弊仍嚴禁私渡增步軍萬人戍京以西  
四萬人戍京以東選陝西騎兵二千增京畿之衛諭陝西堅守  
延安臨洮環慶蘭會保安綏德平涼德順鎮戎涇原邠坊邠寧  
乾耀等處要害分渭南州郡步兵屯平原令宣撫使治邠州副  
使治同州之澄城以統之更以步騎守汾渭諸津九月丁巳朔  
定職官避難不仕違限者奪三官永不升注丙寅樞密院言邊  
事方急昨陝西河東世襲蕃部巡檢與猛安謀克例罷其俸宜  
仍給之庶獲其用其西邊弓箭手有才武出衆獲功未推賞者  
令宣撫司覈實以聞從之戊辰設潼關提控總領軍馬等官置  
河北東路行總管府於原武陽武封丘陳留延津通許杞諸縣  
以治所徙軍戶辛未鎮防軍段仲連進牟三百詔遷三官壬申



建蘇門縣爲輝州癸酉朝謁世祖太祖御容于啓慶宮行獻享禮始用樂甲戌朝謁太宗熙宗睿宗御容行獻享禮詔開滑濟曹滕諸州置連珠寨如衛州乙亥詔經兵處河北山東等路及平涼慶陽臨洮府涇邠秦鞏德順諸州職事官並以二十月爲滿募隨處主師及官軍義軍將校有能率衆復取中都者封王還一品官階授二品職能戰却敵善誘降人取附都州縣者予本處長官散官隨職遷授餘州縣遞減二等紅襖賊周元兒陷深祁州束鹿安平無極等縣真定帥府以計破之斬元兒及殺其黨五百餘人丁丑詔司縣官能募民進糧五千石以上減一資考萬石以上遷一官減二資考二萬石以上升官一等法見闕庚辰陝西宣撫司來上第五將城萬戶楊再興擊走夏人之捷付以空名宣勅凡夏人入寇有能臨陣立功者五品以下

並聽遷授乙酉置大名行總管府于祐城縣以治所徙軍戶十月丁亥夏人入保安都統完顏國家奴破之攻延安戍將又敗之是日捷至戊戌遼東宣撫司報敗留哥之捷丙午夏人陷臨洮陝西宣撫副使完顏胡失剌被執癸丑遼東賊蒲鮮萬奴僭號改元天泰十一月戊午密院進王世安取盱眙楚州之策以爲招撫使與泗州元帥府所遣人同往淮南計度其事戊辰夏人犯綏德克戎寨官軍敗之犯綏平又敗之賞有功將士及來告捷者叅知政事徒單思忠言今陳言者多掇拾細故乞不送省止令近侍局度其可否發遣上曰若爾是塞言路凡係國家者豈得不由尚書省乎庚午上與左丞汝礪商畧遣官括田賜軍之利害汝礪言不便者數端乃詔有司罷其令仍給軍糧之半其半給實價因語宰臣朕恐括地擾民罷其令矣官荒牧馬

地軍戶願耕者聽已爲民永種者勿歛甲戌移刺塔不也軍萬人破夏數萬人於熱罕寨丙子詔市民間輓車贏疾牝馬置羣牧中以圖滋息知臨洮府陀滿胡土門破夏人八萬於城下庚辰上語宰臣舊例點檢左右將軍近侍局官護衛承應人秩滿皆賜匹帛雖所司爲之製造然不免賦取於民近亦罷之止給寶券至於朕所服御亦以官絲付太府監織之自今勿復及民壬午元兵徇彰德府知府陀滿斜烈死之十三月乙酉朔徙朔州民分屯嵐石隰吉絳解等州戊子以軍事免樞密院官朝拜庚寅太白晝見壬辰詔免元日朝賀及親王公主進酒乙未太康縣人劉全時溫東平府民李寧謀反伏誅壬寅詔林州刺史惟宏與都提控從坦同經理邊事諸將功賞次第便宜行之四年正月癸亥朔上面諭御史臺今且覲朝百官旣拜之後始

聞開封府報衝聲四方多故之秋弛慢如此中丞福興號素謹于官事者當一詰之庚午元兵收曹州癸酉更定捕獲偽造寶券者官賞已卯立遼王守禮爲皇太子邊事未寧稍緩冊寶之禮壬午言者請遣官勸農至秋成考其績以甄賞宰臣言民恃農以生初不待勸但寬其力勿奪其時則民自勸遣官反擾耕業何名爲勸上是其言免逃戶租二月甲申朔日食上不視朝詔皇太子控制樞密院事有司議典禮以金鑄撫軍之寶授太子啓稟之際用之是日元兵圍太原召樞密院官問所以備禦之策戊戌免親王公主長春節入賀致禮己亥元兵攻下霍山諸隘甲辰命參知李準爲脩奉太廟使奏告祖宗神主于明俊殿權祔肅宗神主于世祖室奉始祖以下神主于隨室祭器以瓦代銅獻官以公服行事供張等物並從簡約庚戌詔凡死節

之臣籍其數立廟致祭三月丁巳曲赦中都河北等路議軍戶  
給地事乙丑延州刺史溫徹可喜上疏言皇太子宜選正人爲  
師保已巳命禮部尚書張行信提控社稷預告其事庚午滄州  
經畧副使張文破趙福復恩州丙子曲赦遼東路庚辰復邢州  
捷至四月己丑陝西行省報秦州官軍破妖賊趙川劉高二之  
捷遣官勒單州防禦使僕散倬之罪罷其城役丙申河南陝西  
塋丁酉太白晝見于奎己亥夏人葩俄族都管汪三郎進千羊  
率其蕃戶來歸詔納之優給其直辛丑兗州泗水人郝定僭稱  
大漢皇帝署置百官攻陷秦安勝兗單諸州及萊蕪新泰等十  
餘縣滕邳之間道路不通詔樞密院招捕禦備五月癸丑朔行  
都太廟成禮官奏禮從簡約惟以親行祔享爲敬請權停鹵簿  
儀仗及宮縣樂舞從之山東行省上沂州捷己巳夏人將圖臨

洮鞏州闕長安命陝西行省嚴爲之備六月壬辰遼西僞瀛王  
張致遣完顏南合張頑僧上表來歸詔授致特進行北京路元  
帥府事兼本路宣撫使南合北京兵馬總管同知頑僧廣寧府  
同知丙申水星晝見于奎百有一日乃伏癸卯詔有司祈雨罷  
河北諸路宣撫更置經畧司壬子旱詔李革審決京師冤獄七  
月甲寅郝定伏誅乙卯飛蝗過京師勅減尚食品物及後宮歲  
給繖帛有差閏月辛卯復深州癸巳翰林學士完顏字迭進中  
興事跡甲午詔舉奇才絕力之士頒格賞罰提控都副統等官  
互舉其屬許功過相除品官及草澤人一體升降庚子詔河南  
陝西鎮防軍應及納粟補官者當役如舊候事定乃聽赴銓  
八月甲寅三原縣僧廣惠進僧道納粟多寡與都副威儀及監  
寺等格從其言謂之乙亥命大名招撫便募人持詔往諭中都

民丙子元兵攻延安九月辛巳朔攻志州壬辰攻代州經畧使  
奧屯醜和尚禦戰敗績身被數創被執欲降不屈死之十月己  
未上率親王百官奉安祖宗神主于太廟行祔享禮赦中外庚  
申招射生獵戶練習武藝知山徑者分屯陝虢要地辛酉元兵  
攻潼關西安軍節度使泥龐古蒲魯虎禦戰戍兵皆潰死之乙  
丑詔立賞格諭河南官吏軍民募立功之士命叅政徒單思忠  
提控京師鎮撫移刺周刺阿不屯關陝詔吏禮兵工四部尙書  
董治防城器械鑿坎穿築垣墻戊辰命張行信攝太尉奉安社  
稷禮樂咸殺其數己巳元兵徇汝州諭附京民盡徙其芻糧入  
城官儲併運之公河惟存通報小舟餘皆焚之庚午詔宿柵州  
縣簽民爲兵就署隊長以自防遏河南行省胥鼎自將精兵入  
援上命樞府督軍應之辛未置官領招賢所事有自負長才不

爲人所知者聽赴所自陳其間智勇識畧能區畫者內外官採訪以聞得實超任仍實舉主壬申以龍虎衛上將軍襲滿羊哥知歸德府兼行樞密院事丙子知河南府完顏合打以徵兵失應坐誅已卯戶部郎中魏琦沒于王事命官其子已卯從吏部令史韓希祖言自今曾以戰功致身者盡拘京師備用十一月庚辰朔增定守禦官及軍人遷賞格乙酉元兵至汚池右副元帥蒲察阿里不孫軍潰失其所佩虎符辛卯詔立功五品以上官賜饌御前六品以下官賜饌近侍局癸巳上諭皇太子京城捉控官有以文資充者彼豈知兵其速易之甲午放免諸職官儼從及諸司局射糧兵卒嘗選充軍者戊戌勅諸州縣簽籍軍民以備上寇已亥華州元帥府復濬關庚子元兵退罷在京防城民軍河南路統軍使紇石烈掃合發兵後期誅之十二月癸



亥元兵攻平陽丙寅徇大名府壬申進自代州神仙橫城及平  
定永天鎮諸隘攻太原府乙亥木虎高琪請修南京裏城時民  
力方困上嘆此役一興病滋甚矣城雖完固朕亦何能獨安此  
乎是歲扶風郿縣蟲傷麥京兆鳳翔同華河南鄧裕汝亳宿泗  
等州大蝗分遣往捕之

興定元年正月癸未宋賀正使朝辭上語宰臣聞息州南境有  
盜此乃彼界饑民公准爲亂爾宋人何故來擾高琪請伐之以  
廣疆土上曰朕意不然但能守祖宗所付足矣安事外討琪謝  
臣言誠過今雨雪應期皆聖德所致而能包容小國天下幸甚  
乙未詔中都西京北京等路策論進士及武舉人權試于南京  
東平婆速上京等四路丙申東平行省言調兵以來吏卒因勞  
進爵多至五品例獲封贈及民年七十並該單恩若人往自陳

公私俱費請令本路爲製誥勅類赴朝廷以求印署使受命者  
量輸諸物而給之庶人力不勞兵食少濟從之乙巳元兵攻觀  
州二月戊申朔初用貞祐通寶一貫賞寶券千貫己酉命樞密  
院汰罷軟軍上尚書省議減冗員用官馬給驛傳以紓民力癸  
丑罷招賢所乙卯皇孫生百官稱賀詔無用樂己未元兵徇忻  
代詔定坐乏軍儲州縣官積階至三品者聽行部決遣尚書省  
請罷州府學生廩給上不許三月戊寅勅事關刑名當面議之  
勿聽轉奏乙酉上宮中見蝗遣官分道督捕仍戒勿以苛暴擾  
民己亥元兵攻新城庚子攻霸州四月庚戌滕州花帽軍作亂  
詔山東行省討之南陽五朶山盜衆至千餘命節度副使移刺  
羊哥討之遇于方城招降不從上前奮擊殺其衆殆盡戊午單  
州南雹傷稼詔遣官勸諭農民改蒔秋田官給其種平定州賊

閻德用之黨閻顯殺德用以其衆降時詔興兵伐宋所招義軍  
各置總領使副叅知政事李革疏請以義軍界州縣爲今之計  
當養兵息民養銳待敵宋雖造釁止可自備若不恐小忿以勤  
遠畧恐敵乘之反不能支尚書省上奏秋防在邇改法非便姑  
如舊制命州縣各司察之壬申詔諭遼東諸將亟討蒲鮮萬奴  
并捕受僞署官家屬得所降按察使高禮妻子皆戮之五月戊  
寅陝西行省奏破夏人于大北岔丁亥民施汝濟上書陳言利  
害上以示宰臣有可采者卽施行之壬辰延州原武縣雨雹傷  
稼詔官貸民種改時癸巳宋人攻潁州焚掠而去戊戌行樞密  
院兵敗宋人于泥河灣又敗之樊城縣辛丑宋人取漣水縣癸  
卯陝西行省奏蘭州水軍千戶李平等苦提控滿察燕京貪暴  
殺之搆夏人以叛脅其徒張垓俱行戍以計盡獲之便宜遷官

四階爲蘭州同知賞士卒有差甲辰元兵下沔城縣軍官任福  
死之丙午定河北求仕官曾經總兵者自樞密院餘驗據聽渡  
河六月己酉脩潼關遣中使持詔及暑藥勞夫匠設潼關使副  
及三門集津提舉官壬子制鄜坊丹州四品以下州縣官視環  
慶例以二十月終更丙辰詔樞密院遣經歷官分諭行院嚴兵  
利器以守衝要仍禁飲宴違者以軍律論戊午宋人合土寇攻  
東海境辛酉以進士朱益草澤人李維嶽論議可取詔給八貫  
石俸自後凡上書人其言已采用者上其姓名已已遼東行省  
遣使來上正月中敗契丹之捷七月辛巳宋人圍泗州壬午圍  
靈壁縣癸未隕州振威軍萬戶馬寬逐其刺史李策據城叛遣  
使招降復叛州吏擒戮之夸其族乙酉宋人襲破東海縣丙申  
置提舉倉場使副癸卯太社壇產嘉禾一莖十有五穗甲辰夏

人犯黃鶴全官軍敗之乙巳初置集賢院知院事同知院事等  
官宋人及土寇攻海州經畧使擊破其衆又戰石湫南戰連水  
縣戰中土橋宋兵敗績夏人圍羊狼寨帥府發諸鎮兵擊走之  
八月戊申木波賊犯洮州行省敗之遁去癸丑宋人攻確山縣  
爲我軍所敗命大臣議其事集賢院諮議官朱益上書陳禦敵  
三策壬戌海州經畧使阿不罕奴失刺及提控李元與宋人戰  
屢捷多所俘獲甲子徙欄通渡經畧司於黃陵峒乙丑制增定  
擒捕逃軍賞格及居停人罪九月戊寅夏人犯綏德之克戎寨  
都統羅世卿逆擊却之己卯蔡州帥府偵宋人將窺息州以輕  
兵誘其進別以銳師邀擊之鹵其將沈俊壬午改元大赦辛卯  
元兵徇陽州及汾西縣癸巳攻沁州乙未元兵攻太原陂箕掌  
寨丁酉薄太原城攻交城清源癸卯立汾河冰墻鹿角十月丁

未霖雨詔寬農民輸稅之限甲寅命高汝礪張行簡同脩章宗  
實錄癸丑息州帥府獻破宋人于中渡之捷乙卯元兵徇中山  
府及新樂縣丙辰丹州進嘉禾異畝同穎辛酉制定州府司集  
官失覺姦細罪及職官不求仕規避不赴任法乙丑元兵下磁  
州又收鄒平長山及淄州壬午從宜移刺買奴言五朶山賊魚  
張二等屢詔免罪若悉誅之恐乖恩信且其親屬淪落宋境近  
在均州或相構亂乞貸其死徙之歸德雖陳鈞許間爲便詔許  
之己丑元兵收山東濱棣博三州庚寅下沂州甲午河西掬納  
篋納等族千餘戶來歸戊戌元兵攻太原府庚子上語宰臣朕  
聞百姓流亡逋賦皆配見戶人何以堪又添徵軍須錢太多亡  
者詎肯復業宰臣請命行部官闕實蠲貸已代納者給以恩例  
或除他役或減本戶雜征四之一止曰朕於此事未嘗去懷其

亟行之十二月甲辰朔元兵攻潞州都統馮甫死之戊申卽墨  
移風砦得日本國大船中有太宰府民七十二人因糴遇風飄  
至中國詔有司覆驗無他給以糧餉俾還本國庚戌元帥左監  
軍蒲察五斤進右副元帥權遼東行省叅知政事是日元兵平  
益都府甲寅渤海州經畧使報提控韓璧敗宋人于鹽倉己未元  
兵復攻沂州官民棄城遁辛酉又下密州

二年正月乙亥詔議賑恤免中京嵩汝等州逋租壬午宋人攻  
淮北唐州元帥府擊敗之獲統領季雄輔陳阜以歸癸未元帥  
并近侍局副使訛可遣使報南師之捷乙酉元兵圍夏王城李  
遵項命其子居守出走西涼詔諭諸帥府明斥候嚴守備戊子  
宋人攻泗州又戰却之二月癸卯宋人侵青口行樞密院遣兵  
敗之甲辰克宋敵關諭胥鼎可保則保不可保則焚毀而還丙

午訛可敗宋人于防山庚戌海州經畧敗宋兵于朐山表請繼  
其軍儲督東平帥府發兵護送資糧以應之許州長社縣何冕  
等謀反伏誅丁巳壽州行樞密院破宋人高柳橋水砦夸其民  
而還壬戌訛可遣兵板宋柵碁盤嶺又破其衆於裴家莊寒山  
嶺龍門關等處得粟二千餘石乙丑上諭樞密院中京商號諸  
州軍人願畊屯田比括地授之聞徐宿軍謂予田必絕其廩給  
獨不願受朕意豈肯其令曉之又諭尚書省聞吏部多繳駁中  
都納粟官殊不知方闕乏時利害如何又責立功戰陣人保官  
若輩皆義軍白丁豈識職官朕在都時嘗植恩授規運薪炭入  
城者以官此豈容僞亦爲所沮自今勿復如是三月庚辰尚書  
集文資官雜議進士之選詔依泰和例行之癸未訛可敗宋人  
于光化軍戊子諭宰臣舊制廷試進士日晡後出宮恐能文而



思進者不得盡其才其令日沒乃出辛卯削陝西行尚書楊貞  
五官累杖解職壬辰訛可表言官軍自桐栢入宋境所向克捷  
蒲察五斤奏左監軍哥不霫誣殺防州宣撫副使紇石烈按敦  
上從尚書省奏按敦徐議卹典使牢籠哥不霫五斤又奏遼東  
便宜阿里不孫貸糧高麗不應輒以兵掠其境上遣人往諭使  
知興兵非上國意四月乙巳置河南捕盜使副以濮王府尉完  
顏毛良虎爲宣差提控以巡督之丙午戶部尚書夾谷必蘭爲  
翰林學士承旨權遷東行省叅知政事庚戌御史劾集賢院諮  
議官李維嶽本中山府無極縣進士趙孝選家奴乞正其事上  
命以官銀五十兩贖放爲良任使仍舊乙卯特賜武舉溫廸罕  
繳住以下一百四十人及第戊午紅襖賊犯徐邳行樞密院兵  
大破之癸亥以蝗旱遣重臣審理冤獄并督捕丁卯河南諸郡

塋丁卯臨洮路報敗宋人之捷東平行省又奏敗黑旗賊拔膠西縣梁賊李全來援併破之戊辰河北行省敗紅襖賊進至密州降僞將校數十士卒七百悉服其業五月甲戌招撫副使黃樞阿魯荅襲破李全于莒州及日照縣之南三道擊之追奔四十里辛巳策論詞賦經義進士及武舉人入見賜誥命章服山東招撫司奏萊州民曲貴殺節度經略使內族轉奴自稱元帥構宋人據城叛遣官王庭玉黃樞阿魯荅等討平之斬僞統制白珍及牙校數十人生擒僞節度使呂忠及貴等十餘人誅之朝命庭玉保萊朱琛保密阿魯荅保寧海以安輯其民辛卯壽州行樞密院南城軍攻辛城鎮一軍趣史河與宋人戰勝之王辰河北行省復黃縣乙未第鳳翔秦鞏三道南征將士功各遷其官己亥元兵徇錦州元帥劉仲亨死之六月甲辰樞密院奏

大元集兵應州飛狐將分道南下詔陝西河東各路義士土兵  
蕃漢弓箭手宜亟教閱以備緩急東平單州衝要豫徙其農民  
糧畜置可守之城脩近城水砦因以爲固潼谷遠連商虢宜令  
兩帥府選官按視阨塞壬子紅襖賊犯沂州官軍敗之追至白  
里港都提控齊信沒於陣丙辰遣監察御史粘割梭失往河中  
絳解等郡同守土官商度可保城池丁巳久旱上諭宰臣治京  
獄寃囚有小民納石炭過請官錢論死欲從寬宥高琪不可遂  
止時軍前後官多有濫冒御史言戶部員外郎臧伯昇供億息  
州偶遇官軍戰勝冒遷一官乞論其罪上以勢連帥府多故之  
秋豈爲一官遂忘大計但令今後釐正七月辛未詔賞南征將  
士夏人犯龜谷提控夾谷瑞及其副趙防擊走之己卯遣官望  
祀嶽鎮游瀆于北郊分享太廟社稷祭九宮貴神于東郊以禱

雨遣太子太保阿不罕德剛禮書楊雲翼分道審理冤獄癸未  
大雨太子率親王百官表請御殿復膳庚寅釋明幹官提控銓  
選無違失者與升擢令譯史不任事者驗已歷俸月放滿別選  
能者甲午夏人復犯龜谷瑞又大破之丁酉用點檢承玄言遣  
官詣諸道選寄居守闕丁憂官及親軍入仕才堪總兵者得一  
百六人付樞密任使八月戊申勅親軍百戶以下授職待闕者  
給本俸仍充役俟當赴任遣之己酉詔河北行省完顏選進軍  
援山東招撫使田琢自今將士立功聽先賞以聞元遣木華里  
等帥步騎數萬自太和嶺徇河東乙卯元兵收代州辛酉棣州  
提控紇石烈醜漢討賊張聚大破其衆復濱棣二州姦人李宜  
伏誅復禁北歸民渡河戊辰元兵收臨州九月乙亥下太原府  
丙戌諭皇太子軍務之速動關機會悉從中覆則或稽緩自今

有當亟行者先行後聞戊子置秦關等處九守禦使命完顏蒲察等分戍諸兀元兵徇汾州節度使兀顏訛出虎死之庚寅李全破密州執招撫副使黃綱阿魯荅等度同知夾谷寺家奴辛卯元兵下孝義縣乙未設隨處行六部官以京府節鎮長官充侍郎郎中員外主事勾當官聽所屬任使州府官並充勸農使餘充副使丙申李全破壽光縣十月甲辰又破鄒平縣戊申破臨朐縣己酉元兵徇絳潞壬子攻平陽提控郭用死之癸丑下平陽甲寅詔諸部錄囚官凡坐軍期者皆奏讞權平定州刺史范鐸坐棄城伏誅丙辰宋人攻沁水縣提控劉瑛敗之丁巳元兵攻澤戊午從尚書省言獲姦細叛亡率多僧道詔沿邊諸州惟本處受度聽依舊居止來自河北山東遣入內郡護其出入甲子詔河東北路忻代寧化東勝諸州並受嵐州帥府節制十

一月庚午大赦庚辰御登賢門召致政舊臣尚書完顏蒲刺都  
蕭貢僕散偉奧屯札里吉學士完顏孛迭轉運使福僧趙重福  
節度使猪奮石抹仲溫李元輔中尉完顏奴婢刺史紇石烈吉  
咸賜酒食訪問時政得失辛巳以權右都監訛可行元帥府事  
于息州甲申詔河東南路隰吉等州聽絳州元帥府節制升絳  
州爲晉安府總管河東南路兵降平陽爲散府元兵收潞州納  
合蒲刺都叅議官脩注王良臣死之戊子龔谷提控夾谷瑞敗  
夏人于質孤堡己丑河北行省報海州之捷壬辰定經兵州縣  
職官子孫非本貫理蔭及過期不蔭等格丙申元兵下太原之  
韓村砦十二月乙巳命徒單思忠祈雪得之甲寅命開封府治  
中呂子羽等使宋講和至淮宋人不納而還徐州奏紅襖賊攻  
彭城胡村寨州兵擊敗之乙卯以禮部侍郎抹然胡魯刺爲汾

陽軍節度使權元帥石監軍嵐州元帥古里甲完復河東給空  
名宣勅及金銀符許便宜遷注以招脅從丁巳籍瀕河埽兵癸  
亥詔伐宋命皇太子撫軍胥鼎言樞密掌天下兵凡事已屬東  
宮又設諸道行院樞密但奉行文書而已自今軍中號令關賞  
罰者皆明注詔旨毋容軍司得售姦欺從之上憂南征帥不得  
其人與太子謀天下之廣緩惡無可倚嘆息而罷

弘簡錄卷二百十八

終